



ZAKON



O SPREČAVANJU I SUZBIJANJU ZLOUPOTREBE OPOJNIH DROGA

GLAVA I - OPŠTE ODREDBE

Član 1. (Cilj Zakona)

Ovaj zakon donosi se radi sprovođenja Jedinственe konvencije o opojnim drogama iz 1961, dopunjene i izmijenjene Protokolom iz 1972. o izmjenama i dopunama Jedinственe konvencije o opojnim drogama iz 1961, Konvencije o psihotropnim supstancama iz 1971. i Konvencije Ujedinjenih nacija protiv nezakonitog prometa opojnih droga i psihotropnih supstanci iz 1998. (u daljnjem tekstu: međunarodne konvencije o kontroli opojnih droga), sa ciljem sprečavanja i suzbijanja zlouptrbe opojnih droga, a posebno nedozvoljene proizvodnje i nedozvoljenog prometa opojnih droga, psihotropnih supstanci i biljaka iz kojih se može dobiti opojna droga, te supstanci koje se mogu upotrijebiti za proizvodnju opojnih droga ili psihotropnih supstanci (prekursora).

Član 2. (Predmet Zakona)

Ovim zakonom propisuje se:

1. osnivanje posebnih organa za suzbijanje zlouptrbe opojnih droga;
2. razvrstavanje supstanci i biljaka kao opojnih droga, psihotropnih supstanci, biljaka iz kojih se može dobiti opojna droga ili kao prekursora, prema režimu zabrane ili kontrole koji se na njih primjenjuje, te prema njihovoj vrsti i osobinama;
3. svrha i uslovi dozvoljenog uzgoja biljaka iz kojih se može dobiti opojna droga, te uslovi za proizvodnju, promet i posjedovanje opojne droge, psihotropnih supstanci, biljaka iz kojih se mogu dobiti opojna droga i prekursora;
4. nadzor nad uzgojem biljaka iz kojih se može dobiti opojna droga te nad proizvodnjom, prometom i posjedovanjem opojne droge, psihotropnih supstanci, biljaka iz koje se može dobiti opojna droga i prekursora;
5. okvirne mjere za suzbijanje zlouptrbe opojnih droga.

Član 3. (Značenje izraza)

Pojedini izrazi, u smislu ovog zakona, imaju sljedeće značenje:

1. **Opojna droga** je svaka supstanca prirodnog ili vještačkog porijekla koja je uvrštena u listu opojnih droga u skladu sa međunarodnim konvencijama o kontroli opojnih droga ili na osnovu odluke nadležnog organa u Bosni i Hercegovini. Izraz opojna droga, kako se koristi u ovom zakonu, uključuje i psihotropne supstance koje su uvrštene u listu psihotropnih supstanci, ako psihotropne supstance nisu posebno pomenute.
2. **Psihotropna supstanca** je svaka supstanca prirodnog ili vještačkog porijekla, koja je uvrštena u listu psihotropnih supstanci u skladu sa međunarodnim konvencijama o kontroli opojnih droga ili na osnovu odluke nadležnog organa u Bosni i Hercegovini.

3. **Biljka iz koje se može dobiti opojna droga** (skraćeno: biljka) jeste svaka biljka iz koje se može dobiti opojna droga, a koja je uvrštena u listu tih biljaka u skladu sa međunarodnim konvencijama o kontroli opojnih droga ili na osnovu odluke nadležnog organa u Bosni i Hercegovini, kao i dio takve biljke koji se može upotrijebiti za dobijanje opojne droge.

4. **Prekursor** je svaka prirodna ili vještačka supstanca koja se može upotrijebiti u proizvodnji opojne droge i koja je uvrštena u listu prekursora u skladu sa međunarodnim konvencijama o kontroli opojnih droga ili na osnovu odluke nadležnog organa u Bosni i Hercegovini.

5. **Supstance** su opojne droge, psihotropne supstance i prekursori uvršteni u listu opojnih droga, psihotropnih supstanci i prekursora u skladu sa međunarodnim konvencijama o kontroli opojnih droga ili na osnovu odluke nadležnog organa u Bosni i Hercegovini.

6. **Preparat** je otopina ili smjesa, u čvrstom ili tečnom stanju ili u bilo kojem fizičkom obliku, koja sadrži opojnu drogu, psihotropnu supstancu ili biljku iz koje se može dobiti opojna droga.

7. **Sredstvo za proizvodnju opojne droge** je sprava ili drugi predmet koji je namijenjen ili upotrijebljen za dobijanje opojne droge ili psihotropne supstance.

8. **Uzgoj biljke** je sjetva, sadnja, uzgajanje ili žetva biljke ili drugačije uzimanje dijelova biljke iz koje se može dobiti opojna droga.

9. **Proizvodnja** je priprema, prerada, miješanje, prečišćavanje, izrada i svaka druga radnja kojom se dobija ili kojom se doprinosi dobijanju opojne droge, psihotropne supstance, prekursora ili njihovog preparata.

10. **Promet** je svaki način stavljanja u promet opojne droge, psihotropne supstance, biljke, dijela biljke ili prekursora, kao što su uvoz, izvoz, tranzit, nabavka, kupovina, prodaja, zamjena, prenos, skladištenje, izdavanje na recept i slično.

11. **Posjedovanje** je stvarno vlasništvo nad opojnom drogom, psihotropnom supstancom, biljkom ili prekursorom.

12. **Ovisnost** je stanje neodoljive potrebe, psihičke ili fizičke, za upotrebom opojne droge.

13. **Ovisnik o opojnoj drogi** je lice koje se upotrebom opojne droge dovelo u stanje ovisnosti.

14. **Povremeni uživatelj opojne droge** je lice koje jednokratno ili povremeno uzima opojne droge, a kod kojeg se još nije razvilo stanje ovisnosti.

15. **Pomoć ovisniku i povremenom uživaocu opojne droge** jeste pomoć preduzimanjem medicinskih mjera i mjera socijalne pomoći, kao što su psihosocijalna rehabilitacija, savjetovanje i resocijalizacija ovisnika o opojnim drogama.

16. **Zlouptrba opojnih droga ili nedozvoljena upotreba opojnih droga** je uzgoj biljke iz koje se može dobiti opojna droga, posjedovanje sredstva za proizvodnju opojne droge te proizvodnja, promet i posjedovanje opojne droge, psihotropne supstance, biljke ili dijela biljke iz koje se može dobiti opojna droga ili prekursora protivno odredbama ovog zakona, kao i upotreba opojne droge van terapeutskih indikacija, u prekomjernim dozama ili tokom vremena koje nije obuhvaćeno terapijom.

17. **Policija** je nadležni policijski organ u Bosni i Hercegovini.

Član 4.

(Opšte zabrane uz izuzeće za prekursore)

(1) Zabranjen je uzgoj biljke iz koje se može dobiti opojna droga te proizvodnja, promet i posjedovanje opojne droge, psihotropne supstance i biljke iz koje se može dobiti opojna droga, osim pod uslovima i sa ciljem propisanim ovim zakonom.

(2) Zabranjeno je posjedovanje sredstava za proizvodnju opojnih droga, osim pod uslovima i sa ciljem propisanim ovim zakonom.

(3) Zabranjena je upotreba opojnih droga i psihotropnih supstanci, osim pod uslovima propisanim ovim zakonom i propisima iz oblasti humane i veterinarske medicine, odnosno zdravstva i veterinarstva.

(4) Proizvodnja, promet i posjedovanje prekursora dozvoljeni su pod uslovima propisanim ovim zakonom.

(5) Zabranjeno je direktno ili indirektno oglašavanje proizvodnje, prometa, posjedovanja i upotrebe opojnih droga i psihotropnih supstanci, te propagiranje opojnih droga i psihotropnih supstanci na bilo koji drugi način osim u naučnim i stručnim izdanjima namijenjenim naučnicima ili stručnjacima iz oblasti zdravstva.

Član 5.

(Oduzimanje opojne droge, psihotropnih supstanci, biljaka iz kojih se može dobiti opojna droga i prekursora)

Opojna droga, psihotropna supstanca, biljka iz koje se može dobiti opojna droga i prekursor koji se uzgajaju, proizvode, stavljaju u promet ili se nalaze u prometu ili se posjeduju protivno odredbama ovog zakona ili propisa o sprovođenju donijetih na osnovu ovog zakona, biće oduzeti.

Član 6.

(Procjenjivanje godišnjih potreba opojnih droga)

(1) Procjenu godišnjih potreba opojnih droga i psihotropnih supstanci koje se smiju proizvoditi i koje se smiju staviti u promet na teritoriji Bosne i Hercegovine utvrđuje Upravni odbor Agencije za lijekove i medicinska sredstva Bosne i Hercegovine (u daljnjem tekstu: Agencija za lijekove).

(2) Upravni odbor Agencije za lijekove utvrđuje procjenu godišnjih potreba iz stava (1) ovog člana na osnovu procjene godišnjih potreba za Federaciju Bosne i Hercegovine i Republiku Srpsku (u daljnjem tekstu: entiteti) te za Brčko Distrikt Bosne i Hercegovine (u daljnjem tekstu: Distrikt), prema procjeni entitetskih ministarstava nadležnih za poslove zdravstva i nadležnog organa Distrikta.

(3) Procjena godišnjih potreba donosi se na osnovu prijava pravnih i fizičkih, lica ovlašćenih za proizvodnju, promet i posjedovanje opojnih droga.

(4) Prijave iz stava (3) ovog člana podnose se entitetskim ministarstvima nadležnim za poslove zdravstva, odnosno nadležnom organu Distrikta do 15. februara tekuće godine.

(5) Entitetska ministarstva nadležna za poslove zdravstva i nadležni organ Distrikta podnose procjene godišnjih potreba iz stava (2) ovog člana Agenciji za lijekove do 1. marta tekuće godine.

(6) Agencija za lijekove dostavlja podatke o godišnjim potrebama opojnih droga i psihotropnih supstanci za teritoriju Bosne i Hercegovine Komisiji i Odjeljenju za suzbijanje zloupotrebe opojnih droga (član 8) do 31. marta tekuće godine, a drugim organima uprave, zainteresovanim agencijama, službama, ustanovama ili drugim organima u Bosni i Hercegovini na njihov zahtjev.

(7) Međunarodnim tijelima, a posebno Međunarodnom odboru za kontrolu opojnih droga, podaci o godišnjim potrebama

opojnih droga i psihotropnih supstanci za teritoriju Bosne i Hercegovine dostavljaju se u skladu sa međunarodnim konvencijama o kontroli opojnih droga i drugim međunarodnim propisima i mehanizmima djelovanja.

Član 7.

(Državna strategija i Državni akcioni plan)

(1) Parlamentarna skupština Bosne i Hercegovine, na prijedlog Savjeta ministara Bosne i Hercegovine (u daljnjem tekstu: Savjet ministara) donosi Državnu strategiju nadzora nad opojnim drogama, sprečavanja i suzbijanja zloupotrebe opojnih droga u Bosni i Hercegovini, kao osnov za djelovanje organa vlasti, ustanova, udruženja i drugih pravnih i fizičkih lica.

(2) Savjet ministara, na prijedlog Ministarstva bezbjednosti Bosne i Hercegovine (u daljnjem tekstu: Ministarstvo bezbjednosti), donosi Državni akcioni plan borbe, protiv zloupotrebe opojnih droga.

GLAVA II - NADLEŽNI ORGANI

Član 8.

(Komisija i Odjeljenje za suzbijanje zloupotrebe opojnih droga)

(1) Radi uskladjivanja aktivnosti ministarstava i samostalnih upravnih organizacija u Bosni i Hercegovini, te drugih subjekata uključenih u sprovođenje Državne strategije nadzora nad opojnim drogama i suzbijanja zloupotrebe opojnih droga u Bosni i Hercegovini, te radi promovisanja i kontrole sprovođenja Državne strategije, Savjet ministara osniva Komisiju za suzbijanje zloupotrebe opojnih droga (u daljnjem tekstu: Komisija za opojne droge).

(2) Radi sistemskog praćenja pojava, prikupljanja i obrade podataka potrebnih za sprečavanje i suzbijanje nedozvoljene trgovine opojnom drogom, te ostalih kažnjivih djela vezanih za zloupotrebu opojnih droga, kao i koordinacije aktivnosti policije, carinskih i drugih organa u borbi protiv zloupotrebe opojnih droga, Ministarstvo bezbjednosti osniva Odjeljenje za suzbijanje zloupotrebe opojnih droga (u daljnjem tekstu: Odjeljenje za opojne droge).

(3) U sastav Komisije za opojne droge, po službenoj dužnosti, ulaze ministar civilnih poslova, entitetski ministri nadležni za poslove zdravstva i odgovorno lice u Distriktu, te šef Odjeljenja za opojne droge.

(4) Ostala pitanja u vezi sa sastavom Komisije za opojne droge, te druga važna pitanja o njenom radu uređuje Savjet ministara, a Komisija za opojne droge donosi Poslovnik o radu. Stručne i administrativne poslove u vezi sa radom Komisije za opojne droge obavlja Odjeljenje za opojne droge, koje prati i izvršenje zaključaka Komisije.

Član 9.

(Djelokrug Komisije za opojne droge)

U obavljanju poslova iz člana 8. stav (1) ovog zakona, Komisija za opojne droge:

a) razmatra pitanja i daje preporuke i prijedloge za sprovođenje međunarodnih konvencija o kontroli opojnih droga i drugih propisa i mehanizama djelovanja;

b) razvija i stara se o sveobuhvatnom i sistematskom sprovođenju strategije nadzora nad opojnim drogama, sprečavanja i suzbijanja zloupotrebe opojnih droga;

c) propagira preventivno djelovanje i javno obavještanje o štetnoj upotrebi opojnih droga;

d) uspostavlja sistem prikupljanja podataka o prirodi i raširenosti pojave zloupotrebe opojnih droga u Bosni i Hercegovini, te sistem njihove obrade;

e) koordinira i pruža podršku aktivnostima nevladinih organizacija i ostalih udruženja u prevenciji i tretmanu štetne upotrebe opojnih droga;

f) predlaže zakone i ostale propise te druge mehanizme djelovanja u vezi s problematikom zloupotrebe i štetne upotrebe opojnih droga;

g) obavlja i ostale poslove koje joj povjeri Savjet ministara.

Član 10.

(Propagiranje sprovođenja međunarodnih obaveza)

Komisija za opojne droge propagira efikasno sprovođenje međunarodnih konvencija o kontroli opojnih droga, a posebno međunarodnu saradnju u kontroli opojnih droga i preventivnom djelovanju, te odnose sa državama i međunarodnim tijelima za kontrolu opojnih droga i prekursora, te u sprečavanju njihove zloupotrebe.

Član 11.

(Predstavljanje u međunarodnim tijelima i dostavljanje izvještaja i podataka)

U saradnji s nadležnim ministarstvima i upravnim organizacijama (član 22), te Odjeljenjem za opojne droge, predsjednik Komisije za opojne droge predstavlja Bosnu i Hercegovinu u međunarodnim tijelima za kontrolu opojne droge, dostavlja međunarodnim tijelima izvještaje, podatke i informacije u skladu s međunarodnim konvencijama o kontroli opojnih droga i druge potrebne izvještaje i podatke, te se stara da se održava redovna komunikacija s domaćim i stranim stručnim tijelima i službama.

Član 12.

(Podnošenje izvještaja)

Komisija za opojne droge Savjetu ministara, entitetskim vladama, te nadležnom organu u Distriktu podnosi godišnji izvještaj o situaciji i tendencijama u Bosni i Hercegovini u oblasti ponude i potražnje za opojnim drogama, uz odgovarajuće prijedloge djelovanja državnih organa.

Član 13.

(Djelokrug Odjeljenja za opojne droge)

U obavljanju poslova iz člana 8. stav (2) ovog zakona, Odjeljenje za opojne droge:

a) prima i analizira izvještaje o prijavama krivičnih djela i prekršaja u vezi s opojnim drogama, o pravosnažno osuđenim licima za krivična djela i prekršaje u vezi s opojnim drogama, izvršenju kazne zatvora i drugih sankcija prema tim počiniocima, oduzetim količinama opojne droge, psihotropnih supstanci, biljaka i prekursora, novčanim sredstvima i drugoj imovinskoj koristi iz nedozvoljenog prometa opojnih droga, te o prijavama carinskih prekršaja u vezi s opojnim drogama;

b) sakuplja i analizira podatke o godišnjim potrebama opojnih droga koje se u skladu sa zakonom mogu proizvesti i staviti u promet, te prati uzgoj biljaka, uvoz, izvoz i transport opojnih droga i prekursora na osnovu izvještaja o dozvolama nadležnih organa;

c) saraduje s organima na svim nivoima vlasti, ustanovama socijalne zaštite, vaspitnim, obrazovnim, kulturnim, zdravstvenim i drugim ustanovama, vjerskim zajednicama, udruženjima, fondacijama, sredstvima javnog informisanja, te pravnim i fizičkim licima radi sprečavanja zloupotrebe opojnih droga;

d) saraduje s međunarodnim tijelima, ustanovama, udruženjima i drugim pravnim i fizičkim licima, te se stara za efikasno odvijanje međunarodne saradnje u sprečavanju i suzbijanju zloupotrebe opojnih droga, a posebno nedozvoljenog prometa opojnih droga;

e) obavlja i druge poslove u oblasti suzbijanja zloupotrebe opojnih droga koje mu povjeri Savjet ministara ili Komisija za opojne droge.

Član 14.

(Nadležni organi uprave)

(1) Ministarstvo bezbjednosti neposredno ili putem svojih upravnih organizacija, kabineta, službi, odjeljenja i drugih organizacionih jedinica saraduje sa međunarodnim tijelima, ustanovama i organizacijama u otkrivanju i sprečavanju krivičnih djela u vezi s opojnom drogom i drugih kažnjivih djela u oblasti primjene ovog zakona.

(2) Ministarstvo finansija i trezora Bosne i Hercegovine (u daljnjem tekstu: Ministarstvo finansija i trezora) i Sektor za carine Uprave za indirektno oporezivanje Bosne i Hercegovine, Ministarstvo bezbjednosti, te policijski organi Bosne i Hercegovine neposredno saraduju sa međunarodnim tijelima u sprečavanju i suzbijanju neovlašćenog prometa opojnih droga i pranja novca, odnosno prikrivanja protivzakonito dobijene druge koristi.

(3) Ministarstvo civilnih poslova Bosne i Hercegovine objedinjava stručnost i inicijative entitetskih ministarstava nadležnih za poslove zdravstva i nadležnog organa Distrikta u oblasti primjene ovog zakona.

(4) Ministarstvo spoljne trgovine i ekonomskih odnosa Bosne i Hercegovine obavlja poslove u vezi sa spoljnom trgovinom i ekonomijom u oblasti primjene ovog zakona.

(5) Ministar inostranih poslova Bosne i Hercegovine, u saradnji s Komisijom za opojne droge, Odjeljenjem za opojne droge i nadležnim ministrima, brine o izvršavanju međunarodnih obaveza Bosne i Hercegovine u oblasti primjene ovog zakona.

(6) Agencija za lijekove obavlja poslove izdavanja dozvola predviđenih ovim zakonom te druge dužnosti i poslove predviđene ovim zakonom iz oblasti lijekova.

Član 15.

(Međusobni odnosi organa uprave)

(1) U skladu sa Zakonom o upravi Bosne i Hercegovine, međusobni odnosi ministarstava i drugih organa nadležnih po ovom zakonu zasnivaju se na saradnji, međusobnom informisanju i dogovaranju.

(2) U ostvarivanju međusobne saradnje, organi iz stava (1) ovog člana dužni su da jedni drugima dostavljaju podatke i informacije potrebne za obavljanje poslova, razmjenjuju informacije i iskustva, osnivaju zajedničke stručne komisije i druga radna tijela te ostvaruju druge oblike međusobne saradnje.

(3) Državni organi imaju pravo da od organa entiteta i Distrikta traže i prime izvještaje, podatke, informacije te dokumentaciju potrebnu za obavljanje poslova koji su im ovim zakonom povjereni.

(4) Državni organi dužni su da dostave organima entiteta i Distrikta podatke i informacije potrebne za obavljanje poslova po ovom zakonu.

GLAVA III - RAZVRSTAVANJE OPOJNIH DROGA, PSIHOTROPNIH SUPSTANCI, BILJAKA I PREKURSORA, TE NJIHOVA ZABRANA ILI KONTROLA

Član 16.

(Lista opojnih droga, psihotropnih supstanci, biljaka iz kojih se može dobiti opojna droga i prekursora)

(1) Listu opojnih droga, psihotropnih supstanci, biljaka iz kojih se može dobiti opojna droga i prekursora (u daljnjem tekstu: Lista) donosi Savjet ministara.

(2) U Listu se uvrštavaju opojne droge, psihotropne supstance, biljke iz kojih se može dobiti opojna droga i

prekursori, razvrstani prema međunarodnim konvencijama o kontroli opojnih droga.

(3) Uz obavezni sadržaj iz stava (2) ovog člana, Lista može sadržavati bilo koju drugu supstancu i biljku koju Savjet ministara proglasi opojnom drogom, psihotropnom supstancom, biljkom iz koje se može dobiti opojna droga ili prekursorom.

(4) Izmjene i dopune Liste Savjet ministara donosi nakon savjetovanja s Komisijom za opojne droge i Agencijom za lijekove, uzimajući u obzir izmjene ili dopune prema mehanizmima uspostavljenim po međunarodnim konvencijama o kontroli opojnih droga.

(5) Lista se objavljuje u "Službenom glasniku BiH".

Član 17. (Razvrstavanje u Listi)

(1) Opojne droge, psihotropne supstance, biljke iz kojih se može dobiti opojna droga i prekursori, te njihovi preparati u Listi se razvrstavaju u tabele I, II, III i IV, zavisno od kontrolnih mjera koje se na njih primjenjuju.

(2) Materije i biljke uvrštene kao opojne droge ili psihotropne supstance i njihovi preparati razvrstavaju se u jednu od sljedećih tabela:

- Tabela I: Zabranjene supstance i biljke;
- Tabela II: Supstance i biljke pod strogom kontrolom;
- Tabela III: Supstance i biljke pod kontrolom.

(3) Prekursori se razvrstavaju u Tabelu IV.

(4) Supstanca i biljka koja je pod međunarodnom kontrolom ne može biti razvrstana u tabelu koja bi je podvrgla kontrolnim mjerama manje strogim od onih koje se za pojedinu supstancu ili biljku zahtijevaju u skladu sa međunarodnim konvencijama o kontroli opojnih droga.

Član 18. (Nazivi supstanci i biljaka)

(1) Supstance i biljke da člana 17. stava (1) ovog zakona uvrstavaju se u Listu pod svojim internacionalnim nezaštićenim nazivom (INN) ili, ako to nije moguće, pod svojim naučnim nazivom.

(2) Osim uvrštavanja pod propisanim nazivom iz stava (1) ovog člana, u Listi se navodi i hemijski sastav supstanci iz člana 17. stava (1) ovog zakona, ako je moguće.

Član 19. (Zabrana opojnih droga, psihotropnih supstanci i biljaka razvrstanih u Tabelu I)

(1) Uzgoj, proizvodnja, promet, posjedovanje i upotreba supstanci i biljaka razvrstanih u Tabelu I, te njihovih preparata zabranjena je, osim u svrhe medicinskog ili naučnog istraživanja ili u sudskomedicinske, nastavne ili u policijske svrhe, kao što je propisano ovim zakonom (Glava VIII).

(2) Izuzetno od stava (1) ovog člana, uzgoj konoplje i maka dozvoljen je u svrhe i pod uslovima propisanim ovim zakonom (Glava IV).

Član 20. (Kontrola opojnih droga, psihotropnih supstanci i biljaka razvrstanih u tabele II i III)

(1) Uzgoj, proizvodnja i promet supstanci i biljaka razvrstanih u tabele II i III, te njihovih preparata zabranjeno je bilo kojem licu koje nije izričito ovlašćeno za tu djelatnost i u bilo kojem postrojenju i prostorijama koje nisu posebno odobrene za tu svrhu, osim u svrhe medicinskog ili naučnog istraživanja ili u sudskomedicinske, nastavne ili policijske svrhe, kao što je propisano ovim zakonom (Glava VIII).

(2) Posjedovanje i upotreba supstanci i biljaka razvrstanih u tabele II i III, te njihovih preparata zabranjena je svakom licu bez Zakonom propisane dozvole.

Član 21. (Prekursori uvršteni u Listu (Tabela IV))

Proizvodnja, promet i posjedovanje prekursora dozvoljeni su licima koja su za tu djelatnost ovlašćena, te u postrojenjima i prostorijama koji su za tu svrhu odobreni.

Član 22. (Preparati supstanci i biljaka)

(1) Na preparate (lijekovi i drugi preparati) primjenjuju se iste mjere kao i na supstance koje sadrže.

(2) Ako preparat sadrži dvije ili više supstanci, podvrgava se mjerama koje se primjenjuju na najstrože kontrolisanu supstancu.

Član 23. (Odluka o izuzimanju preparata od primjene određene kontrolne mjere)

(1) Preparat koji sadrži supstance razvrstane u tabele II, III i IV, sastavljen tako da nema opasnosti od zloupotrebe ili je ona zanemariva, a iz kojeg se supstanca ne može odvojiti opštedostupnim sredstvima u količini koja bi se mogla zloupotrijebiti ili nedozvoljeno koristiti, može se izuzeti od određenih kontrolnih mjera predviđenih ovim zakonom.

(2) Pod uslovom iz člana 17. stav (4) ovog zakona odluku o izuzimanju iz stava (1) ovog člana donosi Savjet ministara, nakon savjetovanja s Komisijom za opojne droge i Agencijom za lijekove.

(3) Odluka o izuzimanju određuje mjere od čije se primjene preparati iz stava (1) ovog člana izuzimaju.

GLAVA IV - UZGOJ BILJAKA IZ KOJIH SE MOŽE DOBITI OPOJNA DROGA

Član 24. (Dozvoljen uzgoj biljaka ili njihovo uništavanje)

(1) Od biljaka iz kojih se može dobiti opojna droga, dozvoljeno je uzgajati mak i konoplju, u svrhe i pod uslovima propisanim ovim zakonom.

(2) Samonikla biljka iz koje se može dobiti opojna droga uništiće se.

(3) Biljku iz stava (2) ovog člana uništava lice koje po bilo kojem osnovu posjeduje ili koristi zemljište na kojem je biljka izrasla. Ako biljka ne bude uništena u razumnom roku, uništiće je organ nadležan za poslove poljoprivredne inspekcije.

Član 25. (Dozvoljeni uzgoj konoplje)

(1) Konoplju (*Canabis sativa* L) dozvoljeno je uzgajati samo radi proizvodnje vlakana, proizvodnje sjemena za prehranu životinja, daljnijeg razmnožavanja i prerade sjemena.

(2) Uzgoj konoplje dozvoljen je samo pravnim i fizičkim licima koja imaju dozvolu Ministarstva spoljne trgovine i ekonomskih odnosa.

(3) Dozvola iz stava (2) ovog člana može se izdati samo nakon što je sklopljen ugovor o proizvodnji i otkupu konoplje s pravnim licem registrovanom za otkup i proizvodnju konoplje, odnosno za djelatnosti iz stava (1) ovog člana.

(4) Dozvola iz stava (2) ovog člana može se izdati i ako je uzgajivač pravno lice koje je registrovano za otkup i proizvodnju konoplje, odnosno djelatnosti iz stava (1) ovog člana.

(5) Ministar spoljne trgovine i ekonomskih odnosa pravilnikom propisuje:

- a) sorte konoplje koje je dozvoljeno uzgajati;
- b) uslove koje mora ispunjavati pravno ili fizičko lice za dobijanje dozvole za uzgoj konoplje;
- c) rok važenja dozvole, način i troškove njenog izdavanja;
- d) ako je potrebno, i ostale uslove dozvoljenog uzgoja konoplje.

(6) Uzgajivač konoplje dužan je da obavijesti policiju i organ nadležan za poslove poljoprivredne inspekcije o svakoj okolnosti koja ukazuje na sumnju da su konoplja ili dijelovi konoplje upotrijebljeni ili bi mogli biti upotrijebljeni za nedozvoljenu proizvodnju opojne droge.

Član 26.

(Uzgoj maka koji nije namijenjen za proizvodnju opojne droge)

(1) Mak (*Papaver somniferum* L) dozvoljeno je uzgajati, samo u prehrambene svrhe (makovo sjeme).

(2) Uzgoj maka dozvoljen je samo pravnim i fizičkim licima koja imaju dozvolu Ministarstva spoljne trgovine i ekonomskih odnosa.

(3) Uzgajivač maka dužan je da prijavi uzgoj maka organu nadležnom za poslove poljoprivredne inspekcije najkasnije u roku od 30 dana od dana sjetve.

(4) Sva pitanja u vezi s izdavanjem dozvole te obrazac i sadržaj prijave iz stava (3) ovog člana propisuje ministar spoljne trgovine i ekonomskih odnosa.

(5) Uzgajivač maka dužan je da obavijesti policiju i organ nadležan za poslove poljoprivredne inspekcije o svakoj okolnosti koja ukazuje na sumnju da su mak ili dijelovi maka upotrijebljeni ili bi mogli biti upotrijebljeni za proizvodnju opojnih droga (zareziivanje, branje zelenih čaura maka).

(6) Uzgajivač maka dužan je da uništi dijelove biljke preostale nakon košenja ili branja koji mogu služiti za proizvodnju opojne droge (makova slama) odmah poslije košenja ili branja biljke, u prisustvu inspektora organa nadležnog za poslove poljoprivredne inspekcije.

(7) Organ nadležan za poslove poljoprivredne inspekcije podnosi jednom godišnje izvještaj o obavljenoj kontroli uzgoja maka Ministarstvu spoljne trgovine i ekonomskih odnosa.

GLAVA V - SUPSTANCE I BILJKE RAZVRSTANE U TABELE II I III

Član 27.

(Primjena propisa o lijekovima)

Na supstance i biljke razvrstane u tabele II i III te njihove preparate primjenjuju se propisi o lijekovima, odnosno o supstancama i preparatima namijenjenim za upotrebu u humanoj ili veterinarskoj medicini, u mjeri u kojoj nisu suprotni odredbama ovog zakona ili ako propisuje mjere strože od mjera predviđenih ovim zakonom.

Član 28.

(Pravna lica ovlašćena za proizvodnje i promet opojnih droga i psihotropnih supstanci)

(1) Supstance i biljke razvrstane u tabele II i III te njihove preparate dozvoljeno je proizvoditi i stavljati u promet samo pravnim licima koja za obavljanje te djelatnosti udovoljavaju uslovima propisanim za pravna lica koja proizvode lijekove ili veterinarske lijekove i koji imaju dozvolu za proizvodnju i promet supstanci razvrstanih u tabele II i III te njihovih preparata.

(2) Dozvolu za proizvodnju i promet materija razvrstanih u tabele II i III te njihovih preparata licima iz stava (1) ovog člana izdaje Agencija za lijekove.

(3) Lista pravnih lica ovlašćenih za proizvodnju i promet opojnih droga, psihotropnih supstanci i biljaka iz kojih se može dobiti opojna droga objavljuje se u "Službenom glasniku BiH".

Član 29.

(Dozvola za bavljenje proizvodnjom i prometom opojnih droga i psihotropnih supstanci)

(1) Dozvola za bavljenje proizvodnjom i prometom supstanci i biljaka razvrstanih u tabele II i III može se izdati u medicinske, veterinarske ili naučne svrhe.

(2) Dozvola za korišćenje u industriji odnosno u privredi supstanci i biljaka razvrstanih u tabele II i III u svrhe različite od medicinskih, veterinarskih ili naučnih, može se izuzetno izdati ukoliko podnositelj zahtjeva na zadovoljavajući način prikaže da može da obezbijedi da se proizvedena roba neće moći zloupotrijebiti i da neće moći proizvesti štetne efekte, te da se kontrolisana supstanca korišćena kao sastojak ne može jednostavno izdvojiti.

(3) U dozvoli se posebno navodi svaka djelatnost za koju je pravno lice ovlašćeno, svrha obavljanja djelatnosti i svaka supstanca i biljka razvrstana u tabele II i III koju je pravno lice ovlašćeno da koristi za te djelatnosti.

(4) Dozvola za obavljanje djelatnosti iz st. (1) i (2) ovog člana podrazumijeva da je odobreno i posjedovanje supstanci i biljaka razvrstanih u tabele II i III koje su u dozvoli navedene.

(5) Dozvola iz st. (1) i (2) ovog člana može se izdati samo pravnom licu u čijoj se upravi nalazi lice s visokom školskom spremom iz oblasti farmacije.

(6) Na opšte uslove za obavljanje djelatnosti iz st. (1) i (2) ovog člana primjenjuju se odgovarajući propisi.

Član 30.

(Dozvola za postrojenja i prostorije)

(1) Proizvodnja i promet supstanci i biljaka razvrstanih u tabele II i III dozvoljeni su samo u postrojenjima i prostorijama izričito odobrenim za tu svrhu.

(2) Dozvola za postrojenja i prostorije može se izdati samo za postrojenje i prostoriju koje koristi pravno lice ovlašćeno za obavljanje proizvodnje i prometa supstanci i biljaka razvrstanih u tabele II i III.

(3) Za svako postrojenje i za svaku prostoriju koju pravno lice iz stava (2) ovog člana koristi za obavljanje proizvodnje ili promet supstanci i biljaka izdaje se posebna dozvola.

(4) Izdavanje dozvole za postrojenja i prostorije iz stava (1) ovog člana zavisi od provjere da li ispunjavaju postrojenja i prostorije bezbjednosne uslove kojima se olakšava sprovođenje kontrole, a posebno radi sprečavanja neovlašćenog otuđenja ili drugačijeg nestanka supstanci i biljaka.

(5) Bezbjednosne uslove iz stava (4) ovog člana i način provjere njihovog ispunjavanja propisuje Agencija za lijekove uz prethodno mišljenje ministra bezbjednosti.

(6) Dozvolu za postrojenja i prostorije izdaje Agencija za lijekove uz saglasnost ministra bezbjednosti.

(7) U dozvoli za postrojenja i prostorije posebno se navode lica zadužena za ispunjavanje bezbjednosnih uslova.

(8) Prestankom važenja, iz bilo kojeg razloga, dozvole za bavljenje proizvodnjom i prometom supstanci i biljaka razvrstanih u tabele II i III, smatraće se da je po sili zakona prestala da važi i dozvola za postrojenja i prostorije.

Član 31.

(Zajedničke odredbe za izdavanje dozvole za obavljanje djelatnosti te dozvole za postrojenja i prostorije)

(1) Dozvole iz čl. 29. i 30. ovog zakona izdaju se poimenično određenom pravnom licu i neprenosive su.

(2) Dozvole iz čl. 29. i 30. ovog zakona sadržavaju rok važenja.

(3) O izdavanju dozvola iz čl. 29. i 30. ovog zakona Agencija za lijekove odlučuje u roku od 90 dana od dana podnošenja potpunog zahtjeva. Ako u tom roku odluka nije donijeta, zahtjev se smatra odbijenim.

(4) Troškove izdavanja dozvola snosi podnosilac zahtjeva, a prihod su budžeta čiji je korisnik organ koji dozvolu izdaje. Troškovi izdavanja naplaćuju se prilikom izdavanja dozvole, osim troškova izlaska službenog lica radi utvrđivanja ispunjavanja uslova koji se naplaćuju unaprijed.

(5) Ostala pitanja u vezi s izdavanjem dozvole, osim onih iz člana 30. stava (5) ovog zakona, potpunije propisuje Upravni odbor Agencije za lijekove, a posebno sadržaj i obrazac zahtjeva za izdavanje dozvole, sadržaj i obrazac dozvole, rok važenja, te iznos troškova izdavanja dozvole.

Član 32. **(Ograničenje zaliha)**

(1) Pravno lice ovlašćeno za proizvodnju i promet supstanci i biljaka razvrstanih u tabele II i III može da posjeduje samo količine tih supstanci, biljaka i preparata potrebne za uredno odvijanje poslovanja.

(2) Agencija za lijekove može da odredi najveću količinu supstanci i biljaka razvrstanih u tabele II i III, te njihovih preparata koje je svako pojedinačno pravno lice iz stava (1) ovlašćeno da drži u kalendarskoj godini.

Član 33. **(Godišnja odobrenja za proizvodnju)**

Agencija za lijekove, uzimajući u obzir tržišne uslove, svake godine određuje najveće količine supstanci i biljaka razvrstanih u tabele II i III, te njihovih preparata koje je svakom pojedinačnom pravnom licu dozvoljeno da napravi. Ograničenja će se tokom godine izmijeniti ako je potrebno.

Član 34. **(Lica ovlašćena za obavljanje uvoza, izvoza i tranzita)**

Samo pravnim licima koja imaju dozvolu za proizvodnju i promet supstanci i biljaka razvrstanih u tabele II i III dozvoljeno je da obavljaju uvoz, izvoz i tranzit supstanci i biljaka razvrstanih u tabele II i III, te njihovih preparata.

Član 35. **(Posebna dozvola za uvoz, izvoz i tranzit)**

(1) Za svaki uvoz i izvoz potrebna je posebna dozvola koju izdaje Agencija za lijekove.

(2) Dozvola za uvoz, izvoz ili tranzit je neprenosiva.

(3) Dozvola za uvoz, izvoz ili tranzit sadrži svoj rok važenja.

(4) Rokove važenja, kao i ostala pitanja u vezi sa izdavanjem dozvole iz stava (2) ovog člana propisuje Upravni odbor Agencije za lijekove. Propisani obrazac dozvole biće obrazac koji propisuje Komisija za opojne droge Ekonomskog i socijalnog savjeta Ujedinjenih nacija.

(5) Izuzetno, uvozna dozvola nije potrebna u slučaju prirodne ili druge katastrofe ili hitnosti. U tim slučajevima, uvoz može hitno da odobri rukovodilac Agencije za lijekove ili ministar civilnih poslova.

Član 36. **(Pakovanje i označavanje)**

(1) Supstance razvrstane u tabele II ili III te njihovi preparati ne smiju da budu stavljeni u promet ako nisu zatvoreni u omote ili spremnike pod svojim nazivom, a u slučaju pošiljke supstanci razvrstanih u Tabelu II te njihovih preparata - označeni dvostrukom crvenom trakom.

(2) Oznaka pod kojom se preparat pojavljuje u prodaji mora da sadrži nazive supstanci razvrstanih u tabele II i III koje sadrži, zajedno s njihovom težinom i postotkom.

(3) Oznake i bilješke na omotima u prometu na malo moraju da sadrže uputstva za upotrebu, kao i upozorenja neophodna za bezbjednost korisnika.

(4) Ako je potrebno, dodatne uslove pakovanja i označavanja propisaje Upravni odbor Agencije za lijekove, nakon savjetovanja s ministrom bezbjednosti.

Član 37. **(Posjedovanje i nabavka u medicinske svrhe)**

(1) Bez posebne dozvole predviđene ovim zakonom, supstance razvrstane u tabele II i III, te njihove preparate mogu da posjeduju i nabavljaju:

a) zdravstvene ustanove radi obavljanja svoje djelatnosti;

b) veterinarske ustanove radi obavljanja svoje djelatnosti;

c) doktori medicine i doktori stomatologije koji se ovlašćeno bave tom djelatnošću, kao sastojak lijeka u količini neophodnoj za pružanje neposredne medicinske pomoći;

d) doktori veterinarske medicine koji se ovlašćeno bave tom djelatnošću - kao sastojak veterinarskog preparata radi pružanja neposredne veterinarske pomoći.

(2) Uz dozvolu Agencije za lijekove, komandanti plovniha objekata i letjelica mogu da posjeduju i nabavljaju supstance razvrstane u tabele II i III te njihove preparate kao sastojak lijeka u količini neophodnoj za apoteku plovnog objekta ili letjelice.

(3) Na osnovu propisanog liječenja supstance razvrstane u tabele II i III mogu da posjeduju i nabavljaju bolesna lica koja su napunila osamnaest godina života, te roditelji odnosno staratelji bolesnika koji nisu napunili osamnaest godina života, kao sastojak lijeka u količini koju odredi doktor medicine ili doktor stomatologije koji se ovlašćeno bavi tom djelatnošću.

(4) Uslov pod kojima lica iz stava (1) ovog člana mogu da posjeduju i nabavljaju supstance razvrstane u tabele II i III, te njihove preparate propisuje Upravni odbor Agencije za lijekove.

(5) Uslove pod kojima komandanti plovnih objekata i letjelica iz stava (2) ovog člana mogu da posjeduju i nabavljaju supstance razvrstane u tabele II i III, te njihove preparate propisuje Upravni odbor Agencije za lijekove.

Član 38. **(Promet na veliko ili malo)**

(1) Promet supstanci i biljaka razvrstanih u tabele II i III te njihovih preparata na veliko mogu da obavljaju pravna lica koja obavljaju djelatnost proizvodnje tih supstanci i pravna lica koja se bave prometom lijekova na veliko.

(2) Promet supstanci i biljaka razvrstanih u tabele II i III te njihovih preparata na malo mogu da obavljaju pravna i fizička lica koja se bave prometom lijekova na malo - apoteke.

Član 39. **(Propisivanje i izdavanje pojedincima)**

(1) Supstance i biljke razvrstane u tabele II i III mogu se pojedincima prepisati samo u obliku farmaceutskog preparata i samo ljekarskim receptom:

a) doktora medicine koji se ovlašćeno bavi tom djelatnošću;

b) doktora stomatologije koji se ovlašćeno bavi tom djelatnošću, radi stomatološkog liječenja;

c) doktora veterine koji se ovlašćeno bavi tom djelatnošću, radi veterinarskog liječenja.

(2) Supstance i biljke razvrstane u tabele II i III može pojedincima izdavati samo ovlašćeno lice u ustanovama i kod lica iz člana 37. st. (1) i (2) i člana 38. stav (2) ovog zakona.

(3) Pravila o ispisivanju i popunjavanju recepata za farmaceutske preparate iz stava (1) ovog člana propisuje Upravni odbor Agencije za lijekove.

(4) Bez obzira na stavove od (1) do (3) ovog člana, Upravni odbor Agencije za lijekove, nakon obavještanja Komisije za opojne droge i Odjeljenja za opojne droge, može, ako situacija to zahtijeva i pod uslovima koje odredi, odobriti apotekarima ili drugim licima ovlaštenim za promet na malo da pojedincima izdaju, bez recepta, a za korišćenje u isključivo medicinske svrhe i u izuzetnim slučajevima, male količine terapeutskih doza farmaceutskih preparata koji sadrže psihotropne supstance razvrstane u Tabelu III.

Član 40.**(Posjedovanje prilikom prelaska državne granice)**

(1) Lica koja prelaze državnu granicu smiju posjedovati lijek koji sadrži psihotropne supstance razvrstane u tabele II i III samo na osnovu medicinske dokumentacije, u količini neophodnoj za ličnu upotrebu u trajanju najviše do sedam dana.

(2) Lica koja su na supstitucijskoj terapiji bolesti ovisnosti ili simptomatskoj terapiji u terminalnoj fazi malignih bolesti, prilikom prelaska državne granice izuzetno smiju posjedovati lijek koji sadrži supstance razvrstane u tabele II ili III, na osnovu medicinske dokumentacije i u količini neophodnoj za ličnu upotrebu u trajanju najviše do 15 dana.

(3) Naziv i količinu lijeka iz st. (1) i (2) ovog člana, uz predočenje medicinske dokumentacije, lice je dužno da prijavi carini prilikom prelaska državne granice.

Član 41.**(Upotreba psihotropnih supstanci za hvatanje životinja)**

Listu psihotropnih supstanci razvrstanih u tabele II i III te njihovih preparata koje je dozvoljeno koristiti za hvatanje životinja utvrđuje Kancelarija za veterinarstvo Bosne i Hercegovine, određujući i uslove za njihovu upotrebu.

GLAVA VI - PREKURSORI RAZVRSTANI U TABELU IV**Član 42.****(Lica ovlašćena za proizvodnju, promet i posjedovanje prekursora)**

(1) Prekursore mogu proizvoditi, stavljati u promet i posjedovati pravna i fizička lica koja su registrovana za obavljanje te djelatnosti i koja za njeno obavljanje ispunjavaju posebne uslove propisane ovim zakonom i drugim propisima, te imaju dozvolu ministra spoljne trgovine i ekonomskih odnosa.

(2) Dozvola za bavljenje proizvodnjom ili prometom prekursora izdaje se u industrijske, medicinske, veterinarske, naučnoistraživačke, nastavne, prehrambene ili druge privredne svrhe.

(3) Dozvola za korišćenje prekursora u industriji odnosno privredi u svrhe različite od medicinskih, veterinarskih ili naučnih izdaje se nakon što podnosilac zahtjeva na zadovoljavajući način prikaže da može obezbijediti da se proizvod neće moći zloupotrijebiti i da neće moći proizvesti štetne efekte, te da se kontrolisana supstanca korišćena kao sastojak ne može jednostavno izdvojiti.

(4) Dozvolu za obavljanje djelatnosti iz st. (2) i (3) ovog člana izdaje ministar spoljne trgovine i ekonomskih odnosa.

(5) U dozvoli se posebno navodi svaka djelatnost na koju je pravno ili fizičko lice ovlašćeno, svrha obavljanja djelatnosti i svaki prekursor koji je pravno ili fizičko lice ovlašćeno da koristi za te djelatnosti.

(6) Dozvola za obavljanje djelatnosti iz st. (2) i (3) ovog člana podrazumijeva da je odobreno i posjedovanje supstanci koje su u dozvoli navedene.

(7) Lista pravnih lica ovlašćenih za proizvodnju i promet prekursora objavljuje se u "Službenom glasniku BiH".

(8) Na opšte uslove za obavljanje djelatnosti iz st. (1) i (2) ovog člana primjenjuju se odgovarajući propisi.

(9) Pravna i fizička lica iz stava (1) ovog člana dužna su da obavijeste policiju o svakoj okolnosti koja ukazuje na sumnju da je prekursor upotrijebljen ili bi mogao da bude upotrijebljen za neovlašćenu proizvodnju opojnih droga (preusmjeravanje).

Član 43.**(Lica ovlašćena za uvoz, izvoz i tranzit prekursora)**

(1) Prekursore mogu da uvoze, izvoze i provoze pravna i fizička lica koja su tehnički opremljena i registrovana za obavljanje te djelatnosti i koja imaju dozvolu Ministarstva spoljne trgovine i ekonomskih odnosa za uvoz, izvoz ili tranzit.

(2) Prekursore koji su lijekovi ili otrovi mogu uvoziti, izvoziti i provoziti pravna i fizička lica koja su tehnički opremljena i registrovana za promet lijekova ili otrova i koja za obavljanje te djelatnosti imaju dozvolu Agencije za lijekove.

(3) Na uslove u pogledu tehničke opremljenosti pravnih i fizičkih lica iz ovog člana primjenjuju se odgovarajući propisi.

Član 44.**(Dozvola za uvoz, izvoz ili tranzit prekursora)**

(1) Dozvola za uvoz, izvoz ili tranzit prekursora može se izdati za određenu pošiljku (pojedinačna dozvola) ili za određenu vrstu i količinu supstance u određenom periodu (zbirna dozvola).

(2) Koju je supstancu dozvoljeno stavljati u promet samo na osnovu pojedinačne dozvole utvrđuje u Listi (član 16) Savjet ministara, na osnovu prethodnog mišljenja ministra civilnih poslova i ministra spoljne trgovine i ekonomskih odnosa.

(3) Dozvolu iz stava (1) ovog člana izdaje Ministarstvo spoljne trgovine i ekonomskih odnosa, po zahtjevu lica iz člana 43. stava (1) ovog zakona, u roku od osam dana od dana prijema zahtjeva. Sadržaj zahtjeva propisuje ministar spoljne trgovine i ekonomskih odnosa.

(4) Za prekursore koji su lijekovi ili otrovi, dozvolu iz stava (1) ovog člana izdaje Agencija za lijekove, u roku od osam dana od dana prijema zahtjeva. Sadržaj zahtjeva za supstance koje su lijekovi ili otrovi propisuje Upravni odbor Agencije za lijekove.

GLAVA VII - ZAJEDNIČKE ODREDBE ZA SUPSTANCE RAZVRSTANE U TABELE II, III I IV**1. Dozvola za obavljanje djelatnosti****Član 45.****(Provjera podnosilaca zahtjeva)**

(1) Dozvola za obavljanje djelatnosti proizvodnje ili prometa supstanci i biljaka razvrstanih u tabele II, III i IV može se izdati tek poslije provjere podataka i stručnih kvalifikacija podnosilaca zahtjeva i lica zaposlenog kod podnosioca zahtjeva koje je odgovorno za izvršavanje obaveza predviđenih ovim zakonom i dozvolom.

(2) Dozvola iz stava (1) ovog člana neće se izdati licu kojem je izrečena pravosnažna presuda za krivično djelo neovlašćene proizvodnje ili stavljanja u promet opojne droge, neovlašćenog prometa opojne droge, posjedovanja ili omogućavanja uživanja opojne droge ili pranja novca u vezi s krivičnim djelima koja se odnose na opojne droge, niti pravnom licu koje zapošljava lice pravosnažno osuđeno za ta krivična djela.

(3) Pravosnažna presuda za krivična djela iz stava (2) ovog člana po sili zakona ima za pravnu posljedicu ukidanje dozvole iz stava (1) ovog člana.

Član 46.**(Poslovanje s isključivo drugim ovlašćenim licima)**

Lica ovlaštena za proizvodnju ili promet materija i biljaka razvrstanih u tabele II, III i IV mogu prodavati, kupovati, prenositi ili na drugi način stavljati u promet supstance i biljke razvrstane u tabele II, III i IV na teritoriji Bosne i Hercegovine samo drugim licima ovlaštenim za proizvodnju, promet ili nabavku i posjedovanje tih supstanci i biljaka.

Član 47.
(Prenos poslovanja)

Lice ovlašteno za proizvodnju ili promet supstanci i biljaka razvrstanih u tabele II, III i IV može prenijeti svoje poslovanje samo licu koje ima dozvolu za obavljanje istih djelatnosti.

2. Uvoz, izvoz i tranzit

Član 48.
(Posebni granični prelazi i carinarnice)

(1) Supstance i biljke razvrstane u tabele II, III i IV dozvoljeno je uvoziti i izvoziti samo preko graničnih prelaza i carinarnica posebno određenih za tu svrhu.

(2) Savjet ministara određuje granične prelaze i carinarnice preko kojih je dozvoljeno obavljati uvoz i izvoz supstanci i biljaka razvrstanih u tabele II i III, te supstanci razvrstanih u Tabelu IV.

Član 49.
(Sadržaj zahtjeva za uvoznu ili izvoznu dozvolu)

(1) Zahtjev za uvoznu ili izvoznu dozvolu za supstance i biljke razvrstane u tabele II, III i IV mora sadržavati:

a) imena i adrese uvoznika i izvoznika, te špeditera ako je poznato;

b) internacionalni nezaštićeni naziv (INN) svake supstance ili, ako to nije moguće, naziv supstance u Listi, njen farmaceutski oblik, a u slučaju preparata njegov tržišni naziv ako ga ima, te količinu svake supstance, biljke i preparata i

c) rok u kojem će se radnja izvršiti, način prevoza koji će se koristiti te granični prelaz na teritoriji Bosne i Hercegovine.

(2) Zahtjevu za izvoznu dozvolu mora se priložiti uvozna dozvola države u koju se supstanca, biljka ili preparat uvozi.

Član 50.
(Sadržaj uvozne ili izvozne dozvole)

(1) Uvozna ili izvozna dozvola mora sadržavati iste podatke kao i zahtjev za njeno izdavanje (član 49. stav (1)) te naziv organa koji je izdaje.

(2) U uvoznoj dozvoli posebno će biti navedeno da li treba uvoz izvršiti samo u jednoj jedinstvenoj pošiljci ili se može izvršiti u više od jedne pošiljke.

(3) Izvozna dozvola mora sadržavati broj i datum uvozne dozvole, potvrđujući da je uvoz dozvoljen.

Član 51.
(Obaveze tokom uvoza ili izvoza)

(1) Primjerak ili ovjerena kopija izvozne dozvole mora se priložiti svakoj pošiljci, a organ koji je dozvolu izdao mora poslati kopiju državi uvoza.

(2) Ako je količina supstance, biljke ili preparata koja je zaista uvezena manja nego što je navedeno u izvoznoj dozvoli, carinarnica će o tome napraviti službenu zabilješku na dozvoli i na svim ovjerenim kopijama, te na carinskoj ispravi.

(3) Kada pošiljka uđe na teritoriju Bosne i Hercegovine ili kada istekne rok uvozne dozvole, carinarnica će kopiju izvozne dozvole uz priloženu ispravu u kojoj su navedene količine svake supstance, biljke ili preparata koji su zaista uvezeni dostaviti organu iz stava (4) ovog člana.

(4) U slučaju uvoza supstanci i biljaka razvrstanih u tabele II i III, carinarnica izvozniku dozvolu uz priloženu ispravu u kojoj su navedene količine svake supstance, biljke ili preparata koji su zaista uvezeni dostavlja Agenciji za lijekove, a u slučaju uvoza supstanci razvrstanih u Tabelu IV - Ministarstvu spoljne trgovine i ekonomskih odnosa.

(5) Agencija za lijekove, odnosno Ministarstvo spoljne trgovine i ekonomskih odnosa izvozniku dozvolu uz priloženu ispravu u kojoj su navedene količine svake supstance, biljke ili preparata koji su zaista uvezeni upućuje državi izvoza.

Član 52.
(Sadržaj trgovačkih isprava)

Trgovačke isprave, kao što su računi, teretni listovi, carinske ili prevozne isprave te druge otpremne isprave, moraju sadržavati:

a) naziv supstance ili biljke kao što je naveden u Listi, te tržišno ime preparata ako ga ima,

b) količine izvezene iz Bosne i Hercegovine, odnosno količine koje se u Bosnu i Hercegovinu uvoze; i

c) imena i adrese izvoznika i uvoznika, te špeditera ako je poznato.

Član 53.
(Zabranjeni uvoz i izvoz)

(1) Zabranjen je uvoz u i izvoz iz Bosne i Hercegovine pošiljaka supstanci i biljaka razvrstanih u tabele II, III i IV, te njihovih preparata putem poštanskog pretinca ili banke na račun stranke različite od stranke koja je navedena u izvoznoj dozvoli.

(2) Zabranjen je uvoz u Bosnu i Hercegovinu pošiljaka supstanci i biljaka razvrstanih u tabele II, III i IV, te njihovih preparata u zatvoreno skladište, osim ako Ministarstvo spoljne trgovine i ekonomskih odnosa, uz prethodno mišljenje Agencije za lijekove, ne potvrdi na uvoznoj dozvoli da odobrava takvu pošiljku.

(3) U slučaju iz stava (2) ovog člana, za bilo koje povlačenje iz zatvorenog skladišta potrebna je dozvola Ministarstva spoljne trgovine i ekonomskih odnosa, izdata uz prethodno mišljenje Agencije za lijekove. U slučaju pošiljke prema stranom određišt, takvo povlačenje smatraće se izvozom. Supstance i biljke razvrstane u tabele II, III i IV, te njihovi preparati koji su uskladišteni u zatvorenom skladištu ne smiju se podvrgnuti bilo kakvom procesu koji bi mogao izmijeniti njihovu prirodu niti im pakovanje smije biti izmijenjeno bez dozvole lica koje upravlja skladištem.

(4) Zabranjen je izvoz iz Bosne i Hercegovine pošiljaka supstanci i biljaka razvrstanih u tabele II, III i IV te njihovih preparata, osim ako država uvoza ne potvrdi na uvoznoj dozvoli da je dozvolila takvu pošiljku.

(5) O dozvolama iz st. (2) i (3) ovog člana organ koji ih izdaje odmah obavještava Odjeljenje za opojne droge. Odjeljenje za opojne droge odmah se obavještava i o dozvoli iz stava (4) ovog člana.

Član 54.
(Zadržavanje pošiljke)

Carinarnica ili drugi nadležni organ zadržaće pošiljku supstanci ili biljaka razvrstanih u tabele II, III i IV te njihovih preparata koji ulazi na teritoriju ili izlazi sa teritorije Bosne i Hercegovine, a koja nije propraćena propisanom uvoznom odnosno izvoznom dozvolom, ili izlazi iz okvira postojeće dozvole, dok se ne utvrdi dozvoljenost pošiljke ili dok se ne odredi oduzimanje pošiljke.

Član 55.
(Tranzit)

(1) Tranzit supstanci razvrstanih u tabele II, III i IV te njihovih preparata dozvoljen je ako je za pošiljku izdata:

a) izvozna dozvola države iz koje se supstanca ili biljka izvozi;

b) uvozna dozvola države u koju se supstanca ili biljka uvozi; i

c) dozvola za tranzit materije ili biljke preko područja treće države do krajnjeg odredišta, odnosno potvrda nadležnog organa te države da tranzit takve supstance ili biljke kroz tu državu nije uslovljen posebnom dozvolom.

(2) Zabranjeno je neovlašćeno preusmjeravanje pošiljke koja je u tranzitu kroz Bosnu i Hercegovinu do odredišta različitog od navedenog u izveznoj dozvoli.

(3) U slučaju zahtjeva za dozvolu za izmjenu puta ili primaoca, smatraće se da se radi o izvozu iz Bosne i Hercegovine u državu različitu od prethodno navedene.

(4) Prevoznik je dužan da pazi da tokom tranzita priroda supstance ili biljke ne bude izmijenjena i da supstanca ili biljka ne budu izložene uticajima koji bi mogli izmijeniti njihovu prirodu, te da originalno pakovanje i pečati ne budu izmijenjeni.

(5) Ako ocijeni da je potrebno, Ministarstvo bezbjednosti može da odredi pojačanu kontrolu nad pošiljkom.

Član 56.

(Vazdušni tranzit)

Odredbe člana 55. ovog zakona ne primjenjuju se kada se pošiljka do druge države prevozi vazduhom. Ako letjelica slijeće na teritoriju Bosne i Hercegovine, uključujući i hitno prizemljenje, smatraće se da se radi o izvozu pošiljke u državu odredišta samo ako je pošiljka odvojena od letjelice i ako okolnosti to zahtijevaju.

Član 57.

(Obaveze carinarnice)

(1) Carinarnica je dužna da na dozvoli iz člana 35. ovog zakona za uvoz, izvoz ili transport supstance ili biljke zabilježi datum i mjesto carinjenja te ime lica koje je obavilo carinjenje.

(2) Primjerak ili kopiju dozvole iz stava (1) ovog člana carinarnica je dužna da dostavi organu koji je dozvolu izdao i Odjeljenju za opojne droge u roku od osam dana od carinjenja.

(3) U slučaju transporta supstanci ili biljaka (član 55), carinarnica je dužna da:

a) za svaku pošiljku utvrdi vrstu i količinu supstanci, biljaka ili njihovih preparata;

b) na carinskoj ispravi zabilježi iz koje države pošiljka dolazi i u koju je državu upućena; i

c) odmah o pošiljci izvjesti Odjeljenje za opojne droge.

Član 58.

(Prenos koji se ne smatra uvozom, izvozom ni tranzitom)

Ne smatra se uvozom, izvozom ni tranzitom prenos lijeka koji sadrži supstancu razvrstanu u tabele II ili III, a koji je namijenjen pružanju hitne medicinske pomoći na plovnom objektu ili letjelici u međunarodnom saobraćaju u količinama neophodnim za tu svrhu, pod uslovom da uz isprave o upisu prevoznog sredstva postoji dozvola za posjedovanje određene vrste i količine lijeka, koju je izdao nadležni organ države upisa.

Član 59.

(Slobodne carinske zone i carinska skladišta)

Na supstance i biljke razvrstane u tabele II, III i IV, koje se uvoze u slobodne carinske zone ili carinska skladišta, primjenjuju se odredbe ovog zakona o uvozu, s istim mjerama koje se primjenjuju i na ostalom dijelu teritorije Bosne i Hercegovine.

3. Ostale odredbe

Član 60.

(Posebni uslovi za proizvodnju ili promet)

Pravna i fizička lica koja se bave proizvodnjom ili prometom supstanci i biljaka razvrstanih u tabele II, III i IV, dužna su da:

a) imaju odgovarajuću opremu za skladištenje, držanje i izdavanje opojnih droga, psihotropnih supstanci i prekursora;

b) čuvaju opojne droge, psihotropne supstance i prekursore u posebnim prostorijama u kojima se ne skladište ostali proizvodi, ili u sefovima s posebnim ključevima, na mjestima kojima neovlašćena lica nemaju pristup; i

c) vode evidenciju opojnih droga, psihotropnih supstanci i prekursora, koju je ovjerila Agencija za lijekove za opojne droge, psihotropne supstance i prekursore koji su lijekovi ili otrovi, a za ostale prekursore koju je ovjerilo Ministarstvo spoljne trgovine i ekonomskih odnosa.

Član 61.

(Mjere bezbjednosti u vezi sa skladištenjem)

(1) Prostorije ili sefovi gdje se drže opojne droge, psihotropne supstance i prekursori moraju biti zaključani i osigurani od prisustva neovlašćenih lica.

(2) Ključevi prostorija ili sefova gdje se drže opojne droge i psihotropne supstance moraju u svakom trenutku biti kod službenika s visokom školskom spremom iz oblasti farmacije ili medicine koji rukovodi držanjem, prodajom ili izdavanjem opojnih droga i psihotropnih supstanci.

(3) Ključevi prostorija ili sefova u kojima se drže prekursori moraju u svakom trenutku biti kod zaposlenika koji rukovodi držanjem, prodajom ili izdavanjem prekursora.

Član 62.

(Evidentiranje radnji)

(1) Svaki uvoz, izvoz, prevozi, kupovina, prodaja ili bilo koje drugo raspolaganje supstancama i biljkama razvrstanim u tabele II, III i IV, moraju se dokumentovati u vrijeme preduzimanja radnje.

(2) Vrstu i sadržaj isprava iz stava (1) ovog člana za materije i biljke razvrstane u tabele II i III propisuje Upravni odbor Agencije za lijekove, a za supstance razvrstane u Tabelu IV ministar spoljne trgovine i ekonomskih odnosa.

(3) Pravna i fizička lica koja se bave djelatnostima iz stava (1) ovog člana dužna su da čuvaju isprave iz stava (2) ovog člana najmanje pet godina.

Član 63.

(Povremeni izvještaji)

(1) Pravna i fizička lica koja se bave proizvodnjom ili prometom supstanci ili biljaka razvrstanih u tabele II, III i IV, dužna su da dostave organu koji im je izdao dozvolu za uvoz ili izvoz tromjesečni izvještaj o količinama svake supstance i svakog preparata koje je uvezen ili izvezen, uz navođenje države porijekla i države odredišta, najkasnije 15 dana po završetku svakog tromjesečja.

(2) Pravna i fizička lica iz stava (1) ovog člana dužna su da dostave organu koji im je izdao dozvolu za obavljanje djelatnosti, najkasnije do 15. februara svake godine, izvještaj za prethodnu kalendarsku godinu u kojem su dužna da navedu:

a) vrstu i količinu svake supstance i svakog preparata koji su uvezeni ili izvezeni, uz navođenje države porijekla i države odredišta;

b) vrstu i količinu svake proizvedene supstance i svakog proizvedenog preparata;

c) vrstu i količinu svake supstance korišćene u proizvodnji druge supstance i preparata, uključujući preparate koji su izuzeti od primjene kontrolnih mjera (član 22. stav (3));

d) količinu svake supstance i svakog preparata nabavljenog ili dostavljenog za promet ili za medicinsko ili naučno istraživanje iz člana 66. ili nastavne ili sudsko-medicinske svrhe iz člana 67. ovog zakona;

e) količinu svake supstance i svakog preparata u zalihama zaključno sa 31. decembrom godine na koju se podatak odnosi;

f) količinu koja se smatra potrebnom u tekućoj godini za svaku supstancu; i

g) svaku drugu okolnost važnu za kontrolu supstanci.

(3) Organ iz st. (1) i (2) ovog člana te Odjeljenje za opojne droge mogu od pravnih i fizičkih lica iz st. (1) i (2) ovog člana zahtijevati međuizvještaje i tokom godine.

Član 64.

(Popisivanje robe i procjena stanja)

(1) Lica koja drže supstance ili biljke razvrstane u tabele II, III i IV, dužna su na početku svake godine da popišu supstance, biljke i preparate koje drže i da ih uporede s količinama na zalihama u vrijeme - prijašnjeg popisa, uračunate zajedno s onima koje su nabavljene tokom protekle godine, i sve količine povučene tokom godine s onim koje se drže u vrijeme tog popisivanja.

(2) Ovlašćena lica, apotekari i lica ovlašćena za izdavanje lijekova, koja prenesu svoje poslovanje, dužna su da u prisustvu lica na koja se poslovanje prenosi sačine popis stvari i bilans, kao što je predviđeno stavom (1) ovog člana.

(3) U slučaju iz st. (1) i (2) ovog člana, o bilo kakvim razilaženjima uočenim u bilansu ili između rezultata bilansa i popisa, ovlašćeno lice, apotekar ili lice ovlašćeno za izdavanje lijekova mora odmah da obavijesti organ koji je izdao dozvolu za obavljanje djelatnosti i Odjeljenje za opojne droge, koji će potvrditi prijem obavještenja.

Član 65.

(Obaveze prevoznika)

(1) Prevoznici su dužni da preduzmu razumne mjere opreza da bi obezbijedili da njihova prevozna sredstva ne budu korišćena za nedozvoljeni promet opojne droge, psihotropnih supstanci, biljaka iz kojih se može dobiti opojna droga te prekursora.

(2) Kada prevoznici obavljaju radnje iz svoje djelatnosti na teritoriji Bosne i Hercegovine, posebno su dužni da:

a) teretne listove podnesu unaprijed, kad god je moguće;

b) robu spremljene u prenosive spremnike (kontejneri ili slično) s pojedinačno provjerljivim pečatom otpornim na neovlašćeno rukovanje; i

c) odmah obavijeste policiju o svakoj okolnosti koja ukazuje na sumnju na neovlašćeni promet.

GLAVA VIII - NAUČNE I POLICIJSKE SVRHE

Član 66.

(Medicinsko ili naučno istraživanje)

(1) Ustanovama koje se bave medicinskoistraživačkom ili naučnoistraživačkom djelatnošću dozvoljeno je da uzgajaju, proizvode, nabavljaju, uvoze, posjeduju i upotrebljavaju materije i biljke razvrstane u tabele I, II i III te njihove preparate u svrhe medicinskog ili naučnog istraživanja i u količinama potrebnim za tu svrhu, ako za to imaju dozvolu Agencije za lijekove.

(2) Upravni odbor Agencije za lijekove, uz prethodno mišljenje ministra bezbjednosti, propisuje uslove pod kojima se ustanovama iz stava (1) ovog člana izdaje dozvola.

(3) Ustanove iz stava (1) ovog člana dužne su da vode evidenciju o količinama biljaka, supstanci i preparata koje

uzgajaju, proizvode, nabavljaju, uvoze, upotrebljavaju, posjeduju i uništavaju.

(4) U evidenciju iz stava (3) ovog člana unose se datumi obavljanja radnji iz stava (3) ovog člana, te nazivi, odnosno imena dobavljača.

(5) Ustanove iz stava (1) ovog člana dostavljaju Agenciji za lijekove i Odjeljenju za opojne droge godišnje izvještaje o upotrijebljenim ili uništenim količinama biljaka, supstanci i preparata, te o količinama koje drže na zalihama.

(6) Evidencija iz stava (3) ovog člana čuva se pet godina.

Član 67.

(Nastavne, stručne i sudskomedicinske svrhe)

Posjedovanje uzoraka supstanci i biljaka razvrstanih u tabele I, II i III te njihovih preparata u količini neophodnoj za svrhe obavljanja nastave i stručnog obrazovanja, sudske medicine i analize, te dresure životinja za otkrivanje opojne droge, Agencija za lijekove može dozvoliti pravnim i fizičkim licima koja obavljaju te djelatnosti, pod uslovima koje propisuje Upravni odbor Agencije za lijekove, uz saglasnost ministra bezbjednosti.

Član 68.

(Posjedovanje pri obavljanju policijskog posla)

Policijski službenik može, radi otkrivanja krivičnog djela i počinilaca, posjedovati supstancu i biljke razvrstane u tabele I, II i III te njihove preparate za svrhe simuliranog otkupa i nadzirane isporuke, u skladu sa primjenjivanim propisima.

GLAVA IX - OKVIRNE MJERE ZA SUZBIJANJE ZLOUPOTREBE OPOJNIH DROGA

Član 69.

(Prevenција i druge mjere)

Okvirne mjere za suzbijanje zloupotrebe opojnih droga su:

a) sistematsko ispitivanje, otkrivanje i praćenje svih pojava u vezi sa zloupotrebom opojnih droga;

b) kontinuirano sprovođenje organizovanih preventivnih vaspitno-obrazovnih programa u porodici, školama, zdravstvenim ustanovama, udruženjima, vjerskim zajednicama i javnim medijima (primarna prevencija);

c) rano otkrivanje i praćenje povremenih uživalaca opojnih droga (sekundarna prevencija);

d) rano otkrivanje, liječenje, rehabilitacija i resocijalizacija ovisnika o opojnim drogama (sekundarna prevencija); i

e) druge mjere u skladu sa Državnom strategijom nadzora nad opojnim drogama i suzbijanja zloupotrebe opojnih droga u Bosni i Hercegovini.

Član 70.

(Obaveza roditelja, nastavnika i drugih lica)

Roditelji, usvojitelji, staratelji, nastavnici, odgojitelji, zdravstveni radnici, radnici u socijalnoj pomoći, poslodavci i sportski radnici dužni su i odgovorni da preduzmu mjere potrebne za prevenciju i suzbijanje zloupotrebe opojnih droga kod djece i omladine, u skladu sa Državnom strategijom nadzora nad opojnim drogama i suzbijanja zloupotrebe opojnih droga u Bosni i Hercegovini.

Član 71.

(Obaveza obavještanja policije)

(1) Sa ciljem suzbijanja zloupotrebe opojnih droga, nadležni organi države, entiteta i Distrikta, kantoni, gradovi i opštine, kao i odgovorna lica u tim organima, kantonima, gradovima i opštinama, dužna su da o svakoj okolnosti koja izaziva sumnju u zakonitost postupanja u vezi s opojnom drogom, a koju saznaju

tokom obavljanja svojih dužnosti i poslova, obavijeste policiju odmah po saznanju.

(2) Obrazovne i vaspitne, kulturne, naučne i druge ustanove, te udruženja i odgovorna lica u tim ustanovama i udruženjima, kao i pravna lica, odgovorna lica koja obavljaju ugostiteljsku djelatnost ili priređuju kulturno-zabavne priredbe, sportske priredbe, predstave ili obavljaju turističku ili sličnu djelatnost, dužna su da o svakoj okolnosti koja izaziva sumnju u zakonitost postupanja u vezi s opojnom drogom, a koju saznaju u obavljanju svojih djelatnosti, obavijeste policiju odmah po saznanju.

(3) Fizička lica, odgovorna lica u pravnim licima, zaposleni u poštama i druga lica koja učestvuju u prenosu i dostavljanju stvari, agenti, špediteri, transportni i skladišni radnici te sva druga lica koja učestvuju u prevozu lica i stvari, dužni su da u slučaju sumnje da je postupljeno protivno odredbama ovog zakona odmah obavijeste policiju.

(4) Posada plovnog objekta ili letjelice, kao i putnici na plovnom objektu ili letjelici dužni su da u slučaju pronalaska opojne droge, biljke ili dijela biljke iz koje se može dobiti opojna droga ili sumnje da je postupljeno protivno odredbama ovog zakona, odmah obavijeste komandanta plovnog objekta odnosno letjelice, koji će nakon prijema obavještenja izvijestiti policiju.

Član 71.

(Zabrana izlaganja lica djelovanju opojne droge)

Zabranjeno je, osim za svrhe propisanog liječenja, izlagati drugoga djelovanju opojne droge stavljanjem opojne droge, biljke ili njenog dijela u hranu, piće ili na drugi način.

Član 72.

(Zabrana odlaganja i ostavljanja igala i šprica)

Zabranjeno je odlaganje ili ostavljanje uprijebljenih igala i šprica na mjestima koja nisu posebno određena za te svrhe, u skladu s propisima koji važe za postupanje s opasnim otpadom.

GLAVA X - EVIDENCIJE

Član 74.

(Evidencije o uzgoju biljaka i raspolaganju opojnom drogom)

(1) Evidenciju o uzgoju biljaka iz kojih se može dobiti opojna droga, o proizvodnji, vrsti i količini, držanju, prodaji, preradi, predaji ili stavljanju u promet ili bilo kojem raspolaganju opojnom drogom ili psihotropnom supstancom, dužna su da vode pravna ili fizička lica koja obavljaju tu djelatnost na osnovu ovog zakona.

(2) Podaci iz stava (1) ovog člana dostavljaju se organu koji je izdao dozvolu za obavljanje djelatnosti i Odjeljenju za opojne droge, u rokovima propisanim u stavu (4) ovog člana, ali najmanje jedanput godišnje.

(3) Oblik i sadržaj evidencije iz stava (1) ovog člana, rokove i način dostavljanja podataka propisuje Upravni odbor Agencije za lijekove, uz prethodno mišljenje ministra bezbjednosti.

Član 75.

(Evidencije o prekursorima)

(1) Evidenciju o proizvodnji, preradi, posjedovanju, prometu, predaji, nestanku ili uništenju prekursora dužni su da vode proizvođači, prerađivači, učesnici u prometu i korisnici prekursora.

(2) Podaci iz stava (1) ovog člana dostavljaju se Ministarstvu spoljne trgovine i ekonomskih odnosa, a za prekursore koji su lijekovi ili otrovi Agenciji za lijekove, u rokovima propisanim u stavu (3) ovog člana, ali najmanje jedanput godišnje.

(3) Oblik i sadržaj evidencije iz stava (1) ovog člana, rokove i način dostavljanja podataka propisuje ministar spoljne trgovine i ekonomskih odnosa, a za prekursore koji su lijekovi ili otrovi Upravni odbor Agencije za lijekove.

Član 76.

(Evidencije o ovisnicima i povremenim uživaocima opojnih droga)

(1) Evidenciju o ovisnicima o opojnim drogama i povremenim uživaocima opojnih droga koji su nakon detoksikacije u postupku odvikavanja, odnosno kojima je pružena pomoć, vodi organ, ustanova za detoksikaciju ili druga ustanova, vjerska zajednica, udruženje ili drugo pravno ili fizičko lice koje se stara ili pruža pomoć ovisnicima.

(2) Lica iz stava (1) ovog člana dužna su da kao tajnu čuvaju podatke o licu ovisniku i povremenom uživaocu opojnih droga, njegovom ličnom i porodičnom životu, sadržaju mjera i okolnostima pružanja pomoći. Tajni podaci mogu se otkriti samo kad je to propisano zakonom i samo u mjeri neophodnoj za postizanje cilja radi kojeg je opravdano otkrivanje tajne. Ti podaci ne mogu se koristiti u druge svrhe.

(3) Statistički podaci iz stava (1) ovog člana dostavljaju se ustanovama za zaštitu javnog zdravlja u Bosni i Hercegovini, entitetskim ministarstvima nadležnim za poslove zdravstva, odnosno nadležnom organu Distrikta i Ministarstvu civilnih poslova po isteku svakog tromjesečja u kalendarskoj godini, a Komisiji za opojne droge i Odjeljenju za opojne droge kad god je to potrebno, a najmanje dvaput godišnje.

(4) Obaveza čuvanja tajne važi za sva lica koja saznaju podatke iz stava (1) ovog člana i lica koja se tim podacima služe za izradu izvještaja, naučnih i stručnih istraživanja, izvještavanja ili u drugu svrhu.

(5) Oblik i sadržaj evidencije iz stava (1) ovog člana propisuje entitetski ministar nadležan za poslove zdravstva, odnosno nadležni organ Distrikta.

Član 77.

(Evidencije koje vode ministarstva, Agencija za lijekove i Sektor za carine Uprave za indirektno oporezivanje Bosne i Hercegovine)

(1) Ministarstvo bezbjednosti vodi evidenciju o prijavama krivičnih djela i prekršaja u vezi s opojnim drogama i o tome najmanje dvaput godišnje izvještava Komisiju za opojne droge.

(2) Ministarstvo pravde Bosne i Hercegovine vodi evidenciju o pravosnažno osuđenim licima za krivična djela i prekršaje u vezi s opojnim drogama, o izvršavanju kazne zatvora i drugih sankcija i mjera prema tim počiniocima i o tome najmanje dvaput godišnje izvještava Komisiju za opojne droge i Odjeljenje za opojne droge.

(3) Ministarstvo finansija i trezora vodi evidenciju o oduzetim količinama opojne droge, novčanim sredstvima i drugoj imovini iz nedozvoljenog prometa opojnih droga i o tome najmanje dvaput godišnje izvještava Komisiju za opojne droge i Odjeljenje za opojne droge.

(4) Ministarstvo civilnih poslova vodi evidenciju o korisnicima socijalne pomoći, ovisnicima i povremenim uživaocima opojnih droga i o tome najmanje jedanput godišnje izvještava Komisiju za opojne droge i Odjeljenje za opojne droge.

(5) Agencija za lijekove vodi evidenciju o dozvolama izdatima po ovom zakonu.

(6) Sektor za carine Uprave za indirektno oporezivanje Bosne i Hercegovine vodi evidenciju o prijavama carinskih prekršaja u vezi s opojnim drogama i o tome najmanje dvaput godišnje izvještava Komisiju za opojne droge i Odjeljenje za opojne droge.

GLAVA XI - OVLAŠĆENJA U SPROVOĐENJU

NADZORA NAD PRIMJENOM ZAKONA

Član 78.

(Odgovorni organi i inspekcija)

(1) Upravni nadzor nad sprovođenjem ovog zakona i propisa donijetih na osnovu ovog zakona obavljaju Agencija za lijekove, Ministarstvo spoljne trgovine i ekonomskih odnosa, Ministarstvo bezbjednosti, Ministarstvo civilnih poslova, Ministarstvo finansija i trezora, te nadležna entitetska ministarstva, odnosno organi Distrikta, svako u okviru svog djelokruga propisanog ovim zakonom i drugim propisima.

(2) Inspeksijski nadzor nad sprovođenjem ovog zakona obavljaju inspektori Agencije za lijekove i inspektori ministarstava, odnosno organa iz stava (1) ovog člana, u okviru djelokruga propisanog zakonom.

(3) U obavljanju dužnosti neposrednog nadzora nad sprovođenjem ovog zakona i propisa donijetih na osnovu ovog zakona, organi iz st. (1) i (2) ovog člana imaju pravo i dužnost da sprovedu redovne inspeksijske kontrole pravnih i fizičkih lica koja se bave uzgojem ili prometom biljaka iz kojih se može dobiti opojna droga ili proizvodnjom, posjedovanjem ili prometom opojnih droga ili prekursora.

GLAVA XII - POSTUPAK S ODUZETIM OPOJNIM DROGAMA, BILJKAMA I PREKURSORIMA

Član 79.

(Predaja ili uništavanje)

(1) Opojna droga, psihotropne supstance, biljke iz kojih se može dobiti opojna droga i prekursori oduzeti na osnovu ovog zakona ili drugog propisa, koji se mogu zakonito upotrijebiti kao sirovina ili na drugi način, biće predati na način predviđen odredbama zakona koje se odnose na postupak prodaje pokretne imovine, pravnom licu koje ima dozvolu za proizvodnju ili promet supstanci razvrstanih u tabele II, III i IV.

(2) Opojna droga, psihotropne supstance i biljke iz kojih se može dobiti opojna droga razvrstane u Tabelu I, a oduzete na osnovu ovog zakona ili drugog propisa mogu biti predate i licima iz čl. 66. do 68. ovog zakona, pod uslovima koje određuje ministar bezbjednosti uz prethodno mišljenje Agencije za lijekove.

(3) Sredstva ostvarena prodajom iz stava (1) ovog člana prihod su predračuna institucija Bosne i Hercegovine i međunarodnih obaveza Bosne i Hercegovine (u daljnjem tekstu: državni predračun) namijenjenog za sprovođenje mjera za suzbijanje zloupotrebe opojnih droga.

(4) Ako se opojna droga, psihotropna supstanca, biljka iz koje se može dobiti opojna droga ili prekursor ne mogu zakonito upotrijebiti, biće uništeni.

(5) Odluke iz st. (1) i (3) ovog člana donosi organ koji je donio odluku o oduzimanju opojne droge, psihotropne supstance, biljke ili dijela biljke iz koje se može dobiti opojna droga ili prekursora, po prethodnom mišljenju Agencije za lijekove.

(6) Organ iz stava (4) ovog člana dužan je da vodi evidenciju o vrsti i količini oduzetih opojnih droga, psihotropnih supstanci, biljaka iz kojih se može dobiti opojna droga i prekursora, te o pravnim licima iz stava (1) ovog člana kojima su opojne droge, psihotropne supstance, biljke ili prekursori predate i uz koju naknadu.

(7) Podaci iz evidencije iz stava (5) ovog člana, dostavljaju se Agenciji za lijekove, Komisiji za opojne droge i Odjeljenju za opojne droge, a za prekursora i Ministarstvu spoljne trgovine i ekonomskih odnosa, jednom godišnje ili na zahtjev tih organa.

Član 80.

(Komisija pred kojom se obavlja uništavanje)

(1) Uništavanje opojne droge, psihotropne supstance, biljke iz koje se može dobiti opojna droga i prekursora obavlja se pred komisijom od pet članova koje imenuje Savjet ministara.

(2) Komisiju za uništavanje iz stava (1) ovog člana čine po jedan predstavnik Komisije za opojne droge, Ministarstva bezbjednosti, Agencije za lijekove, Ministarstva pravde i Ministarstva finansija i trezora.

(3) Komisija za uništavanje iz stava (1) ovog člana podnosi Savjetu ministara tromjesečni izvještaj o svom radu.

Član 81.

(Pravilnik o čuvanju i uništavanju oduzete opojne droge, psihotropnih supstanci, biljaka iz kojih se može dobiti opojna droga i prekursora)

Savjet ministara Pravilnikom o čuvanju i uništavanju oduzete opojne droge, psihotropnih supstanci, biljaka iz kojih se može dobiti opojna droga i prekursora određuje gdje se čuva oduzeta opojna droga, psihotropne supstance, biljke iz kojih se može dobiti opojna droga i prekursori, kao i pobliže način čuvanja i postupanja s oduzetom opojnom drogom, psihotropnim supstancama, biljkama iz kojih se može dobiti opojna droga i prekursora, te njihovog uništavanja.

Član 82.

(Finansijska sredstva za uništavanje)

Finansijska sredstva za uništavanje opojne droge, psihotropnih supstanci, biljaka iz kojih se može dobiti opojna droga i prekursora obezbjeđuju se u državnom predračunu.

GLAVA XIII - PREKRŠAJNE ODREDBE

Član 83.

(Povrede odredaba čl. 25, 28, 30, 35. i 55. ovog zakona)

(1) Novčanom kaznom u iznosu **od 30.000 KM do 100.000 KM** kazniće se za prekršaj pravno lice ako:

1. uzgaja konoplju bez dozvole ministra spoljne trgovine i ekonomskih odnosa (član 25. stav (2)), ili ne obavijesti policiju ili lokalni organ nadležan za poslove poljoprivredne inspekcije, o svakoj okolnosti koja ukazuje na sumnju da je konoplja ili dio konoplje upotrijebljen ili bi mogao biti upotrijebljen za neovlašćenu proizvodnju opojnih droga (član 25. stav (6));

2. proizvodi ili stavlja u promet supstance i biljke razvrstane u tabele II i III ili njihove preparate bez dozvole za proizvodnju i promet takvih supstanci, biljaka ili preparata, ili ako tu djelatnost obavlja bez ispunjavanja uslova propisanih za pravna lica koja proizvode lijekove (član 28. stav (1));

3. proizvodi ili stavlja u promet supstance i biljke razvrstane u tabele II i III ili njihove preparate bez dozvole za upotrebu postrojenja i prostorije (član 30);

4. obavlja uvoz, izvoz, ili tranzit supstanci ili biljaka razvrstanih u tabele II i III ili njihovih preparata bez dozvole Upravnog odbora Agencije za lijekove (član 35. stav (1));

5. obavlja tranzit supstanci razvrstanih u tabele II, III i IV na osnovu propisane izvozne ili uvozne dozvole ili dozvole za tranzit odnosno potvrde da za tranzit dozvola nije potrebna (član 55. stav (1)), ili ako tokom tranzita dođe do izmjene prirode supstance ili biljke, originalnog pakovanja ili pečata ili ako je tokom tranzita pošiljka izložena uticajima koji mogu izmijeniti prirodu supstance ili biljke (član 55. stav (4)).

(2) Za prekršaje iz stava (1) ovog člana kazniće se i odgovorno lice u pravnom licu novčanom kaznom u iznosu **od 5.000 KM do 15.000 KM**.

(3) Za prekršaje iz stava (1) tačke 1. do 7. i tačke 10. ovog člana kazniće se fizičko lice novčanom kaznom u iznosu **od 5.000 KM do 10.000 KM**.

Član 84.

(Povrede odredaba čl. 42, 43, 46. i 66. ovog zakona)

(1) Novčanom kaznom u iznosu **od 20.000 KM do 50.000 KM** kazniće se za prekršaj pravno lice ako:

1. proizvodi ili stavlja u promet prekursore bez registracije za obavljanje takve djelatnosti ili bez dozvole ministra spoljne trgovine i ekonomskih odnosa (član 42. stav (1));

2. obavlja uvoz, izvoz ili tranzit prekursora bez dozvole ministra spoljne trgovine i ekonomskih odnosa (član 43. stav (1)), a za prekursore koji su lijekovi ili otrovi bez dozvole Upravnog odbora Agencije za lijekove (član 43. stav (2)) ili ako nije tehnički opremljeno i registrovano za obavljanje te djelatnosti;

3. postupi suprotno odredbi člana 46. ovog zakona;

4. u svrhe medicinskog ili naučnog istraživanja uzgaja, proizvodi, nabavlja, uvozi, posjeduje i upotrebljava supstance i biljke razvrstane u tabele I, II i III ili njihove preparate bez dozvole Agencije za lijekove, ili ako tu djelatnost obavlja bez ispunjavanja propisanih uslova (član 66. stav (1)).

(2) Za prekršaje iz stava (1) ovog člana kazniće se i odgovorno lice u pravnom licu novčanom kaznom u iznosu **od 3.000 KM do 10.000 KM**.

(3) Za prekršaje iz stava (1) ovog člana kazniće se fizičko lice novčanom kaznom u iznosu **od 3.000 KM do 7.000 KM**.

Član 85.**(Povrede odredaba čl. 4, 26, 36, 37, 62. i 63. ovog zakona)**

(1) Novčanom kaznom u iznosu **od 10.000 do 20.000 KM** kazniće se za prekršaj pravno lice ako:

1. posjeduje opojnu drogu ili biljku ili dio biljke iz koje se može dobiti opojna droga suprotno članu 4. stavu (1) ovog zakona;

2. posjeduje sredstvo za proizvodnju opojne droge suprotno članu 4. stavu (2) ovog zakona;

3. oglašava proizvodnju, promet, posjedovanje ili upotrebu opojne droge ili reklamira opojnu drogu na bilo koji način, suprotno članu 4. stavu (5) ovog zakona;

4. ne prijavi poljoprivrednoj inspekciji mak koji nije namijenjen proizvodnji opojne droge najkasnije u roku od 30 dana od dana sjetve (član 26. stav (3)), ili ne obavijesti policiju i lokalni organ nadležan za poslove poljoprivredne inspekcije o svakoj okolnosti koja ukazuje na sumnju da je mak ili dio te biljke upotrijebljen ili bi mogao biti upotrijebljen za proizvodnju opojnih droga (član 26. stav (5)), ili ako preostale dijelove biljke (makova slama) koji mogu služiti za proizvodnju opojne droge ne uništi odmah po ubiranju biljke (član 25. stav (6));

5. ne zapakuje ili ne označi supstance razvrstane u tabele II i III, te njihove preparate prije njihovog stavljanja u promet, na način propisan u članu 36. ovog zakona;

6. posjeduje ili nabavlja, kao zdravstvena ili veterinarska ustanova iz člana 37. stava (1) tačke a) i b) ovog zakona, supstance razvrstane u tabele II i III ili njihove preparate ne ispunjavajući propisane uslove (član 37. stav (4));

7. propisno ne dokumentuje radnje stavljanja u promet supstanci i biljaka razvrstanih u tabele II, III i IV (član 62. stav (1)), ili ako propisane isprave ne čuva najmanje pet godina (član 62. stav (3));

8. ne dostavi organu koji je izdao dozvolu za uvoz ili izvoz tromjesečni izvještaj o količinama svake supstance i svakog preparata koji su uvezeni ili izvezeni, uz navođenje države porijekla i države odredišta, najkasnije 15 dana po završetku svakog tromjesečja, a bavi se djelatnošću proizvodnje ili prometa supstanci ili biljaka razvrstanih u tabele II, III i IV (član 63. stav (1)); ili ako organu koji je izdao dozvolu za obavljanje djelatnosti ne dostavi izvještaj za prethodnu kalendarsku godinu, propisanog sadržaja, najkasnije do 15. februara tekuće godine (član 63. stav (2)).

(2) Za prekršaje iz stava (1) ovog člana kazniće se i odgovorno lice u pravnom licu novčanom kaznom u iznosu **od 2.000 KM do 7.000 KM**.

(3) Za prekršaje iz stava (1) ovog člana kazniće se fizičko lice novčanom kaznom u iznosu **od 1.000 KM do 3.000 KM**.

Član 86.**(Povrede odredaba čl. 32, 33, 42, 58, 60, 67, 71, 74, 75. i 76. ovog zakona)**

(1) Novčanom kaznom u iznosu **od 5.000 KM do 15.000 KM** kazniće se za prekršaj pravno lice ako:

1. drži veće količine supstanci ili biljaka razvrstanih u tabele II i III ili njihovih preparata od onih koje su mu potrebne za uredno odvijanje poslovanja (član 32. stav (1)) ili drži veće količine tih suistanci, biljaka ili preparata od onih koje su mu određene u kalendarskoj godini (član 32. stav (2));

2. proizvede veće količine supstanci razvrstanih u tabele II i III ili njihovih preparata od onih koje su mu dozvoljene da proizvede (član 33);

3. ne obavijesti policiju o svakoj okolnosti koja ukazuje na sumnju da je prekursor upotrijebljen ili bi mogao biti upotrijebljen za neovlašćenu proizvodnju opojnih droga, a bavi se proizvodnjom ili prometom prekursora (član 42. stav (6));

4. ako obavlja prenos lijeka koji sadrži supstancu razvrstanu u tabele II i III, a namijenjen je pružanju hitne medicinske pomoći na plovnom objektu ili letjelici u međunarodnom saobraćaju u količinama neophodnim za tu svrhu, a da uz isprave o upisu transportnog sredstva ne postoji dozvola za posjedovanje određene vrste i količine lijeka koju je izdao nadležni organ države upisa, ili ako obavlja takav prenos van okvira postojeće dozvole (član 58);

5. ne čuva opojne droge, psihotropne supstance ili prekursore u posebnim prostorijama u kojima se ne skladište ostali proizvodi, ili u sefovima s posebnim ljučevima, na mjestima na kojima neovlašćena lica nemaju pristup (član 60. tačka b);

6. ne vodi ovjerenu evidenciju opojnih droga, psihotropnih supstanci ili prekursora iz člana 60. tačka c);

7. posjeduje uzorke supstanci ili biljaka razvrstanih u tabele I, II i III, te njihovih preparata u svrhe obavljanja nastave i stručnog obrazovanja, sudske medicine i analize ili dresure životinja za otkrivanje opojnih droga, bez dozvole Agencije za lijekove, ili ako s tim uzorcima ne postupa na propisan način (član 67);

8. ne obavijesti policiju o svakoj okolnosti koja izaziva sumnju u zakonitost postupanja u vezi s opojnom drogom koju sazna u obavljanju svoje djelatnosti, odmah po saznanju (član 71. st. (1) i (2));

9. ne vodi propisane evidencije ili ih vodi netačno, neuredno ili sa zakašnjenjem, ili ne dostavi propisane podatke nadležnom ministarstvu (čl. 74. i 75));

10. neovlašćeno otkrije podatak koji je tajana (član 76. stav (2)).

(2) Za prekršaje iz stava (1) ovog člana kazniće se i odgovorno lice u pravnom licu novčanom kaznom u iznosu **od 3.000 KM do 6.000 KM**.

(3) Za prekršaje iz stava (1) ovog člana kazniće se fizičko lice novčanom kaznom u iznosu **od 2.000 KM do 5.000 KM**.

Član 87.**(Povreda odredbe člana 72. ovog zakona)**

Novčanom kaznom u iznosu **od 6.000 KM do 10.000 KM** kazniće se za prekršaj fizičko lice ako stavljanjem u hranu, piće ili na drugi način drugog izlaže djelovanju opojne droge, osim za svrhe propisanog liječenja (član 72).

Član 88.

(Povreda odredaba člana 71. ovog zakona)

Novčanom kaznom u iznosu **od 3.000 KM do 10.000 KM** kazniće se za prekršaj fizičko lice ako pri učestvovanju u prenosu, dostavi ili prevozu lica i stvari, u slučaju sumnje da je postupljeno protivno odredbama ovog zakona, odmah ne obavijesti policiju (član 71. st. (2) i (3)).

Član 89.**(Povrede odredaba člana 57. ovog zakona)**

Novčanom kaznom u iznosu **od 1.500 KM do 3.000 KM** kazniće se za prekršaj službeno ili odgovorno lice u carinarnici ako:

1. ne označi datum i mjesto carinjenja na dozvoli iz člana 35. ovog zakona za uvoz, izvoz ili tranzit supstanci ili biljaka (član 57. stav (1));
2. ne dostavi primjerak ili kopiju dozvole organu koji je dozvolu izdao i Odjeljenje za opojne droge u roku od osam dana od carinjenja (član 57. stav (2));
3. ne utvrdi, u slučaju tranzita supstanci ili biljaka, vrstu i količinu supstanci, biljaka ili njihovih preparata za svaku pošiljku, ili ne označi na carinskoj ispravi državu porijekla pošiljke i državu odredišta pošiljke, ili odmah o pošiljci ne izvjesti Odjeljenje za opojne droge (član 57. stav (3)).

Član 90.**(Povrede odredaba čl. 40. i 73. ovog zakona)**

Novčanom kaznom u iznosu **od 300 KM do 3.000 KM** kazniće se za prekršaj fizičko lice ako:

1. posjeduje pri prelasku državne granice lijek koji sadrži psihotropnu supstancu razvrstanu u tabele II i III bez medicinske dokumentacije ili u količini većoj od neophodne za ličnu upotrebu u trajanju najviše do sedam dana (član 40. stav (1));
2. posjeduje pri prelasku državne granice, a nalazi se na supstitucijskoj terapiji bolesti ovisnosti ili simptomatskoj terapiji u terminalnoj fazi malignih bolesti, lijek koji sadrži supstancu razvrstanu u tabele II i III, bez medicinske dokumentacije ili u količini većoj od neophodne za ličnu upotrebu u trajanju najviše do 15 dana (član 40. stav (2));
3. ne prijavi carini naziv i količinu lijeka iz člana 37. st. (1) i (2) ovog zakona prilikom prelaska državne granice (član 40. stav (3));
4. odloži ili ostavi upotrijebljene igle ili šprice van mjesta koja su posebno određena za te svrhe, u skladu s propisima koji važe za postupanje s opasnim otpadom (član 73.).

Član 91.**(Zaštitne mjere)**

(1) Opojna droga, psihotropna supstanca, biljka ili dijelovi biljke iz koje se može dobiti opojna droga i prekursor te sredstvo za proizvodnju opojne droge iz čl. 83. do 90. ovog zakona, biće oduzeta.

(2) Za prekršaje propisane ovim zakonom (čl. 83. do 90), uz zaštitnu mjeru oduzimanja predmeta iz stava (1) ovog člana, mogu se izreći sljedeće zaštitne mjere:

- a) zabrana obavljanja djelatnosti;
- b) obavezno liječenje od ovisnosti o opojnoj drogi.

(3) Zaštitne mjere iz stava (2) tačke a) i b) ovog člana mogu se izreći u trajanju od tri mjeseca do jedne godine, računajući od dana pravosnažnosti odluke kojom je zaštitna mjera izrečena.

GLAVA XIV - PRELAZNE I ZAVRŠNE ODREDBE**Član 92.****(O Komisiji za suzbijanje zloupotrebe opojnih droga)**

(1) Savjet ministara će osnovati Komisiju za opojne droge iz člana 8. (Komisija i Odjeljenje za suzbijanje zloupotrebe opojnih droga) ovog zakona u roku od mjesec dana od dana njegovog stupanja na snagu. Komisija za opojne droge će u daljnjem roku od 30 dana donijeti pravilnik o svom radu.

(2) Do osnivanja Komisije za opojne droge, poslove iz djelokruga te komisije predviđene ovim zakonom, a posebno dostavljanje izvještaja i podataka međunarodnim tijelima, obavlja Ministarstvo civilnih poslova.

Član 93.**(O Odjeljenju za suzbijanje zloupotrebe opojnih droga)**

(1) Ministarstvo bezbjednosti osnivaće Odjeljenje za opojne droge iz člana 8. (Komisija i Odjeljenje za suzbijanje zloupotrebe opojnih droga) ovog zakona u roku od mjesec dana od dana njegovog stupanja na snagu.

(2) Do osnivanja Odjeljenja za opojne droge, poslove iz njegovog predviđene ovim zakonom obavlja Ministarstvo bezbjednosti.

Član 94.**(O Državnoj strategiji i o Državnom akcionom planu borbe protiv zloupotrebe opojnih droga)**

(1) Savjet ministara izradiće Prijedlog državne strategije nadzora nad opojnim drogama, sprečavanja i suzbijanja zloupotrebe opojnih droga u Bosni i Hercegovini u roku od šest mjeseci od dana stupanja na snagu ovog zakona.

(2) Savjet ministara donijeće Državni akcioni plan borbe protiv zloupotrebe opojnih droga u roku od osam mjeseci od dana stupanja na snagu ovog zakona.

Član 95.**(Prva lista opojnih droga, psihotropnih supstanci, biljaka iz kojih se može dobiti opojna droga i prekursora)**

Izuzetno od odredbe člana 16. (Lista opojnih droga, psihotropnih supstanci, biljaka iz kojih se može dobiti opojna droga i prekursora) stava (1) ovog zakona, prvu listu opojnih droga, psihotropnih supstanci, biljaka iz kojih se može dobiti opojna droga i prekursora, predviđenu ovim zakonom, donosi Parlamentarna skupština Bosne i Hercegovine, zajedno sa donošenjem ovog zakona.

Član 96.**(Prelazna odredba za dužnosti i poslove povjerene ovim zakonom Agenciji za lijekove)**

(1) Dužnosti i poslove povjerene ovim zakonom Agenciji za lijekove do njenog osnivanja obavljaće Ministarstvo civilnih poslova.

(2) Dužnosti i poslove povjerene ovim zakonom Upravnom odboru Agencije za lijekove do osnivanja te agencije obavlja ministar civilnih poslova.

(3) Izuzetno od odredaba člana 6. (Procjene godišnjih potreba opojnih droga) ovog zakona, procjena godišnjih potreba opojnih droga koje se smiju proizvesti i koje se smiju staviti u promet na teritoriji Bosne i Hercegovine za tekuću kalendarsku godinu utvrdiće se na podesan način koji odredi ministar civilnih poslova uz konsultacije sa entitetskim ministrima nadležnim za poslove zdravstva i nadležnim organima Distrikta.

Član 97.**(Propisi za sprovođenje)**

(1) U slučaju da ovaj zakon predviđa da nadležni ministar donese propise za sprovođenje ovog zakona, nadležni ministar

donijeće te propise u roku od tri mjeseca od dana stupanja na snagu ovog zakona.

(2) U slučaju da ovaj zakon predviđa da Upravni odbor Agencije za lijekove donese propise za sprovođenje ovog zakona, ti propisi biće doneseni u roku od šest mjeseci od stupanja na snagu ovog zakona.

(3) Kancelarija za veterinarstvo Bosne i Hercegovine utvrdiće listu iz člana 41. (Upotreba psihotropnih supstanci za hvatanje životinja) ovog zakona, te odrediti uslove upotrebe psihotropnih supstanci za hvatanje životinja u roku od tri mjeseca od dana stupanja na snagu ovog zakona.

Član 98.**(Obaveza pravnih i fizičkih lica na usklađivanje djelatnosti s ovim zakonom)**

Pravna i fizička lica koja na teritoriji Bosne i Hercegovine obavljaju djelatnosti uređene ovim zakonom dužna su da obavljanje te djelatnosti usklade s ovim zakonom u roku od šest mjeseci od dana njegovog stupanja na snagu.

Član 99.**(Prestanak važenja odredaba drugih zakona)**

(1) Stupanjem na snagu ovog zakona prestaju da važe odredbe zakona u Federaciji Bosne i Hercegovine, Republici Srpskoj i Brčko Distriktu Bosne i Hercegovine, koje uređuju pitanja iz člana 2. tač. 2, 3. i 4. ovog zakona.

(2) Odgovarajući zakoni i drugi propisi u Federaciji Bosne i Hercegovine, Republici Srpskoj i Brčko Distriktu Bosne i Hercegovine biće usklađeni s ovim zakonom u roku od godinu dana od njegovog stupanja na snagu.

Član 100.**(Propisi koji se primjenjuju u prelaznom periodu)**

Do stupanja na snagu propisa za sprovođenje iz člana 97. (Propisi za sprovođenje), primjenjuju se propisi doneseni na osnovu zakona iz člana 99. (Prestanak važenja odredaba drugih zakona) ovog zakona, ako nisu u suprotnosti s odredbama ovog zakona.

Član 101.**(Lica ovlašćena za obavljanje djelatnosti prema prijašnjim propisima)**

Pravna i fizička lica iz člana 98. (Obaveza pravnih i fizičkih lica na usklađivanje djelatnosti s ovim zakonom) koje se bave uzgojem, proizvodnjom i prometom opojnih droga, psihotropnih supstanci, biljaka iz kojih se može dobiti opojna droga, te prekursora, na osnovu dozvole nadležnog entitetskog ministra, odnosno nadležnog organa Distrikta, izdate na osnovu zakona iz člana 99. (Prestanak važenja odredaba drugih zakona) stava (1), odnosno propisa iz člana 100. (Propisi koji se primjenjuju u prelaznom periodu), mogu nastaviti svoju registrovanu djelatnost pod uslovima iz člana 98. ovog zakona.

Član 102.**(Dostavljanje propisa generalnom sekretaru Ujedinjenih nacija)**

Ministarstvo inostranih poslova dostaviće generalnom sekretaru Ujedinjenih nacija tekst ovog zakona u roku od osam dana od dana njegovog stupanja na snagu. Tekstove drugih primjenjivih propisa, Ministarstvo inostranih poslova dostavlja generalnom sekretaru Ujedinjenih nacija u roku od osam dana od dana njihovog stupanja na snagu.

Član 103.**(Stupanje na snagu ovog zakona)**

Ovaj zakon stupa na snagu osmog dana od dana objavljivanja u "Službenom glasniku BiH".

PS BiH broj 247/05
28. novembra 2005. godine
Sarajevo
Predsjedavajući
Predstavničkog doma
Parlamentarne skupštine BiH
dr **Nikola Špirić**, s.r.

Predsjedavajući
Doma naroda
Parlamentarne skupštine BiH
Mustafa Pamuk, s.r.